

四庫全書

史部

欽定四庫全書

史部

殿閣詞林記卷五

詳校官侍讀<sub>臣</sub>陳萬青

刑部郎中<sub>臣</sub>許兆椿覆勘

總校官進士<sub>臣</sub>繆琪

校對官編修<sub>臣</sub>莊通敏

謄錄監生<sub>臣</sub>王宜

欽定四庫全書

殿閣詞林記卷五

明 廖道南 撰

部學

學士承旨兼吏部尚書詹同

詹同字同文舊名書徽州婺源人生而穎靈獨抱奇氣  
元學士虞集以其弟槃之子妻之至正中舉茂才異等  
授郴州路學正遇亂道梗因家黃州陳友諒徵為學士

承旨兼御史高皇帝平陳首召同為國子博士易其名  
曰同未幾以為待制起居注時命有司求遺書上謂同  
曰三皇五帝之書不盡傳于世故後世鮮知其行事漢  
武帝購求遺書六經始出唐虞三代之治始可得見武  
帝雄才大畧後世罕及表章六經開闡帝王之學又有  
功于後世吾每于宮中無事輒取孔子之言觀之如節  
用而愛人使民以時真治國之良規誠萬世之師也遂  
命攷宗廟時享禮洪武元年四月命畫古孝行及起家

戰伐歷試愁苦為圖以垂世訓上謂同曰朕家本業農  
祖父皆長者世承忠厚積善餘慶以及于朕今圖茲以  
貽子孫俾知王業艱難也同對曰陛下昭德垂訓莫此  
為切上曰富貴易驕艱難易忽久遠易忘後世子孫生  
長深宮惟見富貴習于奢侈不知祖宗積累之艱故示  
之俾朝夕覽觀庶有所警也是年十二月以同為直學  
士二年三月為侍讀學士劉基疏請加禮大臣同因取  
戴記及賈誼疏以進且復開說剴切上深納之又諭同

曰古人為文章或以明道德或以通當世之務典謨之言明白易知無深怪險僻之語至如諸葛亮出師表亦何嘗雕琢為文而誠意溢出使人讀之自然忠義感激近世文士不究道德之本不務當世之務立辭雖艱深而意實淺近即使過於司馬相如揚雄何裨實用自今翰林為文但取通道理明世務者無事浮藻四年乃陟為吏部尚書上諭曰吏部者衡鑑之司鑑明則物之妍媸無所遁衡平則物之輕重得其當蓋政事之得失在

庶官任官之賢否由吏部任得其人則政理民安任非其人則瘵官曠職卿等居銓衡之任宜在公平以別賢否六年七月以同為學士承旨兼吏部尚書上御奉天門謂同曰論行事於目前不若鑒之於往古卿儒者試言古先帝王為治之道同對曰帝王之治莫善于唐虞三代可以為萬世法上曰三代而上治本於心三代而下治由乎法本於心者道德仁義其用為無窮由乎法者權謀術數其用有時而窮然為治者違乎道德仁義

必入于權謀術數甚矣擇術不可不慎也九月壬寅與  
宋濂等修日歷為總裁官七年五月丙寅書成名曰皇  
明寶訓同以老乞歸上賜之敕曰朕起布衣提三尺劍  
總率六師以拯民艱延攬英雄以圖至治凡二紀于茲  
曩者親征武昌下城之日爾同以文學之美從朕同游  
厥後任博士起居注學士皆舉其職又長吏部辨人才  
之賢否審職任之輕重咸得其宜今年雖已邁猶輸誠  
效謀迄無少怠可賢也已朕不忍以爾耄年服役奔走



特命以翰林學士致仕爾惟欽哉未幾復起為學士承  
旨同所著有天衢吟嘯及海涓集子徽為左都御史兼  
太子少保吏部尚書以事坐廢徽子紱為太子洗馬改  
尚寶司丞廖道南曰予嘗艤舟黃人之墟訪詹同之蹟  
父老猶能言之及觀國史乃見其獻納忠懇被寵優渥  
天造建侯各因其才爾矣可不謂榮焉贊曰烏惟擇木  
魚則依水君臣同游保全終始苟弗善始胡克令終於  
昭豪傑附鳳攀龍玉堂視草銓衡秉鑑倚與休哉皇謨

斯贊

學士晉兵部尚書樂韶鳳

樂韶鳳字舜儀滁州全椒人洪武初授起居注拜中書左司員外郎歷陟兵部侍郎尚書六年改侍講學士與承旨詹同定祀孔子樂章三月製中都城隍神主上親為文遣韶鳳奉安九月編集日歷韶鳳為催纂官又命擇唐宋名儒表箋可為式者頒行天下是月又命撰祭祀禮成回鑾樂歌八年三月上以舊韻起于江左多失

正音乃命韶鳳與諸廷臣以中原雅音正之書成名曰  
洪武正韻九月命攷陵寢朔望節序祀禮韶鳳奏諸廟  
寢園各有便殿日祭于廟時祭于便殿漢都洛陽以關  
西諸陵久遠但四時特牲致祭洛陽諸陵每正月祭郊  
廟畢行禮唐園陵皇祖至太祖陵皆朔望節序祭皇考  
陵朔望節序進食我朝每歲元旦清明七月望十月朔  
冬夏二至用太牢致祭其伏臘社每月朔望用特羊是  
年十一月詔定登壇舁禮韶鳳奏古者侍坐于長者

屨不上堂解屨不敢當階就而舉之屏於側漢魏以後  
朝祭則跣襪唐禮志正旦冬至朝賀上公一人詣西階  
脫舄解劍束開寶通禮太廟裸獻饋食并禘祫皇帝詣  
東階下解劍脫舄今議於郊祀廟享前期有司設御幕  
于壇東南門外及設執事官脫屨之次于壇門外西側  
上皆從之十二年八月又詔定皇太子與諸王往復書  
劄禮韶鳳考據精詳屢蒙褒答未幾以病免歸復起為  
國子祭酒上賜諭曰文廟之設是尊先師也因之為國

學焉歷代以之訓君嗣教公子也故哲王必選名儒以  
導學者今朕法前代命爾承是師範闡揚博通使幼者  
記壯者解毋怠寸陰有補于朕政汝往欽哉韶鳳為人  
和易簡諒兄弟皆知名于時曰暉開封守曰禮太常卿  
曰穀諸暨同知廖道南曰予幼讀魏杞山詩有云詹吳  
宋樂皆時彥撰述承恩晝夜同已知樂學士為名人矣  
及觀國史乃得其詳乃知稽古禮文厥功亦不為無助  
也贊曰滁州之域是為全椒篤生偉人德音孔昭士林

之宗邦家之彥熙績兵曹蜚英翰苑康侯三錫于彼日  
中詹吳宋樂芳名靡窮

侍講學士拜禮部侍郎蔣驥

蔣驥字良夫浙江錢塘人洪武庚辰進士授行人改授  
檢討宣德初轉侍講五年同考會試得陳詔為第一預  
修兩朝實錄進侍講學士拜禮部侍郎初解縉逮繫詔  
獄辭連贊善王汝玉及驥縉死而汝玉及驥為顯官驥  
子琳歷仕副都御史巡撫貴州征草塘有功後為仇構

賜死孫銘為中書舍人廖道南曰予至錢塘眺天目游  
西湖乃訪蔣君之墟閭里父老尚能談其事者及考杭  
志則又多稱其賢予乃泫然悲之贊曰錢塘之江子胥  
怒潮西湖之許武穆沈滲偉哉蔣君屢遭危禍雖數之  
奇亦緣其過

吏部尚書兼學士王直

王直字行儉江西泰和人永樂甲申進士選庶吉士授  
修撰太宗幸北京命直同黃淮楊士奇侍皇太子于南

京及再幸北京命直扈從預修高廟實錄轉侍讀仁宗  
登極進侍讀學士尋遷右庶子預修兩朝實錄擢少詹  
事仍兼侍讀學士階中順大夫英宗嗣位總裁宣廟實  
錄成擢禮部侍郎兼學士出佐部事與胡忠安公相得  
甚懽吏部尚書郭璉去以直代之加資德大夫正治上  
卿正統己巳額森入境中官王振勸上北征直率廷臣  
上疏曰邊鄙之事自古有之惟在守備嚴固而已國朝  
備邊最為上策謀臣猛將堅甲利兵隨處備禦且耕且



守今宜慎固封守申明號令俾堅壁清野按兵蓄銳彼  
前不得戰退無所掠人馬疲困自當遠遁何必親御六  
飛遠臨榆塞况秋暑未退旱氣蘊隆青草不豐水泉猶  
塞人畜之用實有未充且兵凶戰危利害難保古之聖  
王敬慎不忽蓋有所見而然茲褻至尊臨險地非所以  
養威持重存大體也上不從命直留守京師加太子太  
保榮祿大夫景泰初進少傅兼太子太師議遣使奉迎  
太監興安傳諭曰今日誰為文天祥富弼直正色曰主

憂臣辱主辱臣死誰敢有不用命者興安語塞天順改  
元乞休歸年八十四卒贈太保謚文端子積為翰林檢  
討曾孫思為編修李文達公銘其墓曰侃侃王公天賦  
其秀有聲煜然大江之右鑾坡鳳閣容與翱翔惟學之  
昌惟譽之芳遂秉銓衡不倚不忒百司庶府位稱其德  
廖道南曰初額森入境時人心洶洶莫知所裁直率百  
寮廷爭此其為心天日皎皎可鑒焉者及景泰中陳循  
當國直亦無所附麗廷議奉迎正色而對蓋直躬而篤

於好古者也彭韶贊曰刻志苦學早登科甲被命留京  
慎勤守法迎復之間惟公首對即却權奸辭鋒斂氣公  
性雖嚴公有雅度大年有識泣以銘墓

禮部尚書兼侍講學士王英

王英字時彥江西金谿人永樂甲申進士選庶吉士戊  
子重修高廟實錄丁亥授修撰丙申轉侍講戊戌二月  
扈從太宗北征至庫陵海五月旋師過李陵臺命英往  
視碑文英視畢奏稱碑陰有達魯噶齊字上命毀之謂

英曰爾是二十八人中讀書秀才耶朕需爾用宜勿憚  
勞英因奏曰強人入邊罪在不赦但聞天兵遠征遁歸  
沙漠願勿窮追上曰秀才惟不欲窮兵黷武朕為天下  
國家計爾又曰軍中一切動靜爾有所聞即來密奏上  
駐蹕安平鎮有軍士以有過立功無行糧者英曰此皆  
壯士也願宥其過而與之庶得其死力上即命兵部尚  
書李慶給之甲辰上復北征晏駕榆木川英與尚書蹇  
義夏原吉學士楊榮楊士奇同議喪禮宿內閣凡七日

仁宗登極進侍講學士尋遷右春坊大學士明年賜告  
歸省宣宗嗣位召入便殿問曰洪武中有宋濂吳沉朱  
善劉三吾永樂間則解縉胡廣俱有重名汝當勉旃罔  
俾前人獨專厥美預修兩朝實錄陞少詹事兼侍講學  
士賜金相犀帶壬子守制奪情正統初預修宣廟實錄  
充總裁官擢禮部侍郎仍兼侍講學士癸亥命往祀南  
鎮祈雨還奏修省事宜上從之果大雨戊辰陟南京禮  
部尚書卒謚文安廖道南曰予觀陳敬宗所撰文安傳

以為撫州多名儒若宋之晏殊元之吳澄蓋玉筍寶蓋  
諸山之靈所鍾也及讀國史謂文安樂易善書跌宕不  
拘小節固有徵哉贊曰漢有二王咸負芳名宋有二王  
並登宰衡文端曰直文安曰英勲如其名永世有徵

學士拜禮部侍郎錢習禮

錢習禮名幹以字行江西吉水人永樂辛卯進士選庶  
吉士授檢討洪熙初轉侍讀戊申賜觀燈萬歲山撰詩  
以進是歲典應天鄉試庚戌進侍讀學士壬子上臨幸

史館賦招隱歌賜近臣習禮拜賜是歲典順天鄉試天  
順改元預修兩朝實錄充經筵官陞學士是歲復典應  
天鄉試己卯復典順天鄉試乙丑主考會試擢禮部侍  
郎致仕卒年八十九謚文肅尚書王直銘其墓曰惟公  
世家海內所聞政事文章亦煥其羣廖道南曰予讀國  
史謂文肅恬靜少慾恭而有禮及攷諸吉志則又稱其  
以清節重望名海內人不敢干以私夫君子立身始于  
幾微極于廣大著于鄉黨昭于邦國庸言庸行豈一朝

一夕之故哉乃知文肅之獲譽于人所由來者遠矣贊  
曰靜以正本坦而有容流芳史局為光為龍明堂柱礎  
清廟鍾鏞彼美人兮穆如清風

學士拜禮部侍郎李紹

李紹字克述江西安福人宣德癸丑進士選庶吉士授  
檢討預修宣廟實錄以刺員汰歸楊士奇薦之未及用  
景泰初召充經筵官轉修撰歷司經局洗馬兼修撰遷  
右庶子兼侍講天順初改尚寶司卿仍兼侍講進學士



尋陞禮部侍郎時有權貴相軋以紹奏事多南音沮之  
英廟弗聽且曰禮部不可無此人以士奇常薦之癸未  
會試紹充貢舉防範甚嚴釐革宿弊成化初預修英廟  
實錄充副總裁書垂成以疾求解任歸後國子祭酒缺  
吏部尚書姚夔薦之召命甫至卒子瑤為雲南布政使  
廖道南曰予觀江西通志稱紹素有隱德及攷國史乃  
知楊文貞之力居多士伸於知己信哉贊曰周昌期期  
周舍諤諤口納不言行果而確克述土音聞者驚愕獨

簡當宁典司禮樂

學士拜禮部侍郎倪謙

倪謙字克讓應天上元人生有四乳人咸異之正統己未進士及第授編修甲子命祀北岳己巳轉侍講使朝鮮景泰壬申遷左中允兼侍講侍經筵以易儲事進侍講學士丙子預修寰宇通志遷左春坊大學士天順紀元改通政司左參議仍兼侍講遣祭遼荆楚三府還進學士戊寅憲宗出閣充講讀官己卯主考順天鄉試以

舉子奏發陰事下詔獄謫戍開平成化初復學士職預  
修英廟實錄擢南京禮部侍郎御史陳選劾之致仕己  
丑階正議大夫資治尹復侍郎職丙申陟禮部尚書卒  
贈太子少保謚文僖子岳為吏部尚書阜布政使萬安  
銘其墓曰偉哉文僖體貌奇異學識超羣詞華鳴世致  
身翰林振玉鏗金出使外國驚服夷心歸講經帷尋直  
秘殿克當淵衷累承寵眷簡侍青坊啓沃少海天畀困  
橫欲資亮采帝思舊學仍拜舊官晉少宗伯懇乞歸閒

養晦七年有詔復起進大宗伯典茲三禮廖道南曰予  
觀國史謂文僖嗜進太急多比匪人以故屢致姜菲不  
有文毅曷昭幽潛語有之犁牛之子騂且角於乎況匪  
犁乎贊曰鍾阜儲英大江炳靈幼鍾異質壯負修能禹  
錫玄都宗元鈇鋤詞翰殊芳疇與為伍於乎不朽貴在  
德修賴有元方其澤悠悠

侍讀學士晉南京吏部尚書錢溥

錢溥字原溥直隸華亭人正統四年進士太監王振訪

可教內侍書者或薦溥試薔薇露詩大見稱賞特授檢討景泰辛未遷左贊善兼檢討七年修寰宇通志轉左諭德兼編修天順紀元改尚寶司少卿兼官如故俄陞侍讀學士修大明一統志充副總裁壬午頒詔安南充正使貽書與其王論郊迎禮甚悉甲申降廣東順德知縣成化丙戌詔復舊官尋起掌南京翰林院事丙申陞南京吏部左侍郎陟尚書致仕卒賜諡文通溥性輕躁嗜進嘗作秃婦傳以譏商輅有太監王倫者受業於溥

當英廟大漸時倫出就溥舍妄議時政邏者得之以聞  
下獄罪且不測有左右之者乃得末減出為知縣雖累  
被彈劾尚遷崇秩識者鄙之廖道南曰士之立身可不  
慎哉王振以巨璫秉政嚙脊背憎譎張為幻溥也何人  
乃首附之卒之不理于口非言者之過也溥之罪也贊  
曰漢之喬固白刃罔避唐之訓注甘露不畏一忠一佞  
同事異術溥何人斯居身靡基積久滋彰云胡弗愧

侍讀學士晉禮部尚書周洪謨

周洪謨字堯弼四川長寧人正統甲子鄉試第一明年進士及第授編修景泰中遷左贊善兼編修上疏十二事景帝嘉納尋轉侍講改侍讀掌南京翰林院事成化初召修英廟實錄進侍讀學士未幾陞南京國子祭酒守制服闋改北監上疏奏增孔子樂舞從之踰年擢禮部侍郎適尚書張文質去位以洪謨代之時議憲宗皇帝升祔暨孝穆皇太后饗禮上疏畧曰禮必援情以立義事當據古以證今謹按周制天子七廟三昭三穆與

太祖之廟而七文王武王為宗故為九廟蓋以后稷為  
始祖文武為世室皆百世不遷其餘則以次而祧前乎  
周則商以契為祖而湯與三宗百世不遷後乎周則宋  
以僖祖為祖而太祖太宗亦百世不遷雖迭有異議大  
儒程頤朱熹皆以尊僖祖為得禮之正蓋報本反始義  
所當重也我高皇帝肇建丕圖追祀四祖至英宗上賓  
遂備九室在當時則德祖為高祖無可推之親在今日  
則德祖當為始祖無可祧之主臣愚以為太祖太宗比



周文武萬世不祧懿祖而下當以次遞遷茲遇憲宗升  
祔宜于太廟寢殿之後倣古夾室之意別建一殿分為  
九室以俟藏祧主況古有祫祭合祧廟與未祧之主而  
祭之于太廟故謂之祫今宜於歲暮之餘奉迎懿祖祧  
主仍居舊位以享祫祭每歲一祭視古三年一祫為有  
加矣周禮大司樂歌中呂舞大醵以享先妣謂姜嫄為  
帝嚳妃為后稷母故特立廟以祀至宋元德懿德二后  
既有別廟之享章獻章懿二后遂有奉慈之建每歲五

享四時薦新上食如常儀茲遇孝陵皇太后祔葬茂陵  
所有神主宜于奉先殿旁近宮空室改為別廟庶情文  
咸秩幽明允協矣上從其議又手製璿璣玉衡圖以木  
代之規制工巧識者服其精致仕歸尚草奏安國禦夷  
十事上之卒所著有四書疑辨錄邱文莊公銘其墓曰  
明興百年多文學士士專一經惟用作義雷同勦說誰  
復致疑侃侃周公實惟經師剖析精微擿抉疎漏死者  
復生亦不予咎學既宗經文必根理矧居顯位不徒尊

已人皆迂公孰知所存無待而興卓爾不羣廖道南曰  
予夙侍帝座廻翔天門乃見洪謨所制璿璣圖者張平  
子之靈憲郭守敬之簡儀後先若符及讀五經疑辨錄  
則又知其用心精密如此非有本而能然乎贊曰堯授  
四時舜齊七政顯庇穹祇潛探玄運俗儒罔覺誦習成  
書承訛襲舛白首紛如矯矯周公直窺象緯璿璣製圖  
宗桃析禮文莊之銘可謂知人闡幽明微以步芳塵  
侍讀學士晉禮部尚書李本

李本字立之四川富順人正統戊辰進士選庶吉士授檢討轉編修預修一統志進侍讀英廟實錄成遷南京太常少卿尋擢禮部侍郎陟尚書卒賜祭葬如例本性質直不為詭異之行然慷慨尚義間有義舉則欣然為之其文章平實類其為人平生不拘小節晚在禮部頗自豪縱言官劾其與世浮沉非定論云廖道南曰夫莊生有言自處才不才之間以其無近刑無近名也本也始而官吏局歷奉常何其華也繼而登八座掌三禮何

其要也然而名不孚實悲夫贊曰玉壘之山山石巉巖  
錦江之水水雲潺湲巍巍邦彥蹇蹇王官夷考其人天  
路孔艱

學士晉南京吏部尚書王與

王與字廷貴常州武進人景泰辛未進士及第授編修  
天順癸未轉侍講侍皇太子于東宮成化紀元遷左庶  
子兼侍講尋陞學士掌南京翰林院事守制服闋起為  
南京國子祭酒時教法久弛與嚴立規程精核勤惰雖

權貴不少貸九載考績陞南京吏部右侍郎召入為戶部左侍郎尋陟南京戶部尚書改吏部考覈諸司官屬去取務合輿論卒贈太子太保謚文肅與風采凝峻喜自誇詡居家侈靡子沂至右副都御史廖道南曰予觀劉文安之贈文肅也以為事君服勤左右無方亶其然矣及予棹毘陵過其里造其廬有陶朱猗頓之風豈其父子相繼而然耶不然何其豪奢綺麗至此極也贊曰於惟季札封于延陵高風邈悠洗濯清冷王氏之先世

有撫仕曰諒曰忠不顯亦世嗣時厥後八座兩臺漸不可長亦已焉哉

學士晉工部尚書謝一夔

謝一夔字大韶初冒王姓江西新建人天順庚辰廷試第一授修撰預修英廟實錄遷左諭德成化辛卯十二月一夔上言彗星之變災異至大謹上五事一曰正宮闈以端治本二曰親大臣以詢治道三曰開言路以決壅蔽四曰慎刑獄以廣好生五曰謹妄費以足財用上

怒斥之及預修宋元綱目進學士未幾擢禮部侍郎陟工部尚書卒贈太子少保一夔為人和易平實與人交久而益親尤篤于友義為文不事奇詭雕刻其佐禮部則惟務交好不復持重初都御史閔珪以江西多盜緣京宦佃戶窩聚占恡不發乃奏欲併坐其主一夔與尹直晰之調珪於廣西或問之一夔曰珪之謬也匪吾省李孜省密奏里閭其為紅巾乎自是人始知朝政紛更皆孜省之為也廖道南曰予觀江西志謂一夔言婉氣



和善謀而成及觀其所上諸疏侃而閤異而法有足追古者但比之匪人未免遜尾可惜也哉贊曰南昌魁選前謝後舒杜門講學排闥上書謝登穹顯舒抱於邑月旦有評予奚容喙

學士晉禮部尚書徐瓊

徐瓊字時庸江西金谿人天順丁丑進士及第授編修預修一統志賜賚有差成化紀元預修英廟實錄丁亥轉侍講典應天鄉試還進侍讀學士掌南京翰林院事

未幾陞太常卿掌國子監祭酒事弘治庚戌擢禮部侍郎丙辰陟禮部尚書加太子少保因四方災異上言請勤聖學崇君德罷齋醮停工役禁傳奉辦忠邪數事上可之瓊為人和易然托姻貴戚陞遷太驟臺諫論列每及其名云廖道南曰自國初以來官必久任政必歷試而後躋崇階列顯庸漢儒所謂累日取責積久致官者勢也瓊自天順至弘治亦已久矣史猶譏其驟遷乃若後之朝滯省署暮超巖廊者又何如哉贊曰翠雲銅斗

寔開金谿黃蜂玉香迴繞丹梯乃生徐君穎異羣兒詞  
林史局啟歷以時禮曹曹監敷施有宜貽譏青史夫亦  
何為

禮部侍郎兼學士汪諧

汪諧字伯諧浙江仁和人舉京闈鄉試被革歸復舉浙  
江鄉試天順庚辰登進士改庶吉士授編修預修英廟  
實錄成化丁亥轉修撰秩滿遣右諭德修宗元綱目成  
陞右庶子侍東宮講讀孝宗登極進少詹事兼侍講學

士修憲廟實錄充副總裁官弘治辛亥陟禮部侍郎兼  
學士請老許之卒贈禮部尚書諡儀度整潔深中簡言  
慮事周悉晚益慎密子登中書舍人舉太常卿李文正  
公銘其墓曰惟浙東西山清水竒文獻之邦兮公在累  
朝史局經闡校文場兮為名侍臣為能史官主司之良  
兮穹階顯曹渙號下頌表幽堂兮廖道南曰予初筮仕  
時乃見諧之二子登舉皆翩翩貴公子也其婉順脂韋  
如其父云贊曰惟彼錢塘右海左湖海色沆瀣湖光鬱

紓彼美人兮清揚且都登台踐斗具有訐謨

學士晉吏部尚書倪岳

倪岳字舜咨應天上元人文僖公謙之子也謙初祀北岳禱于神其母姚氏感異夢生岳岳生而體貌豐偉目光炯然望之如神天順甲申登進士改庶吉士授編修預修英廟實錄轉侍讀充經筵講官丁亥修文華大訓成進學士甲辰充東宮講讀官丙午擢禮部侍郎弘治癸亥陟禮部尚書加太子少保儀文制度多所擬定如

革淫祠正神號禁齋醮絕番僧却西域諸疏詳盡四方  
災異必以上聞其大者如皇儲冠婚之禮太廟祫祫之  
儀皆出其議未幾改南京禮部尚書再改南京兵部參  
贊機務上言安邊五事一曰重將權一統制二曰增城  
堡廣斥堠三曰募民壯去客兵四曰明賞罰嚴間諜五  
曰實屯兵復漕運又上七事一曰講學二曰修德三曰  
敬天四曰法祖五曰節宗室六曰汰冗員七曰闢異端  
上皆嘉納之召入為吏部尚書加太子少保卒贈光祿

大夫少保謚文毅官其從子霽為中書舍人岳有文武  
才畧在吏部銓選進退各當其才或言別白太過終當  
召怨則曰吾知冢宰之職當如是耳事當廷議片言裁  
決天下皆仰其風采李文正公銘曰公官北都派出鍾  
阜若麟鳳在藪踵接科第繼踐台斗若玉在崑圃為文  
章宗為經濟手若錦在織若鐘應扣庭充廟薦若商彝  
周白暨掌天曹為百僚首若鏡在懸鑒物妍醜若鋤在  
田務拔稂莠拒捍強禦鎮定紛糾若虎豹在山藜藿為

守若駕輕載重驅疾以走苟非其才陪者十九古亦有  
言君子大受旂常竹帛公且不朽廖道南曰先大夫五  
洪公以弘治癸丑舉進士時李文正公主試事倪文毅  
公知貢舉及甲寅誕夕乃夢二公至庭命名授誥以故  
聞文毅之事為詳於乎安得起公于九京而與之籌國  
也哉贊曰鍾山雄峙萬峰綿焉大江迴繞百川環焉桓  
桓文毅獄降賢焉明明勲業史局傳焉眇於小子夙兆  
先焉嚴訓如在奉周旋焉



學士晉禮部尚書傅瀚

傅瀚字曰川江西新喻人天順甲申進士選庶吉士授檢討成化間轉修撰皇太子出閣命兼司經局校書遷左諭德兼檢討充經筵講官弘治紀元擢太常少卿兼侍讀預修憲廟實錄成進太常卿兼侍讀學士賜告歸省還擢禮部侍郎兼學士掌詹事府事仍直日講預修會典充副總裁官陟禮部尚書率諸曹疏陳三十餘事不報初瀚族同鄉監生江瑤誣奏大學士劉健李東陽既

而恐謀泄遂嫁其禍于詹事程敏政大學士謝遷尚書  
王華咸中誣之及敏政死瀚代之家人驚見怪異瀚憂  
悸成疾卒贈太子太保謚文穆子闕為庶吉士授監察  
御史廖道南曰予讀國史於瀚極其訾議謂敏政之死  
瀚實構之及觀西涯所撰墓銘則又獎與無間詞何也  
豈其實有之與將誣之也贊曰豫章之郡盤龍縟綿五  
星奠位二峰柱天三劉博雅三孔仁賢彼哉曰川何獨  
不然

學士晉禮部尚書李傑

李傑字世賢蘇州常熟人成化丙戌進士選庶吉士授  
編修轉侍講乙巳充東宮講讀官進侍讀學士弘治初  
遷左庶子仍兼前職辛亥陞南京國子祭酒守制服闋  
改太常卿兼侍讀學士掌院事庚申擢禮部侍郎正德  
紀元預修孝廟實錄充副總裁大學士焦芳擅竄國史  
傑亦未如之何書成陟南京禮部尚書丁卯調禮部時  
逆瑾用事晉府鎮國將軍表謙賂瑾求封為郡王傑持

正不與瑾銜之竟以是去廖道南曰瑾之炳國虐焰薰灼一時附麗奔走惟翰苑居多傑乃不辱其身不挫其志亦可尚也贊曰漢之五侯唐之八閹若趨炎海若倚冰山傑也人傑掛冠蘇門跡雖往矣神則猶存

侍讀學士晉禮部尚書張昇

張昇字啓昭江西南城人成化己丑進士第一授修撰侍皇太子于東宮充講讀官遷左贊善轉右諭德孝宗登極進左庶子兼侍讀疑大學士劉吉抑己因天變劾

奏萬安尹直相繼罷去獨劉吉尚留深結科道昏暮款  
門柔佞取悅無所不至貴戚萬喜依憑宮壺光焰燠灼  
吉與締姻請託公府賂入私門亟宜斥譴如漢策免三  
公以應災異可也疏上御史魏璋等阿吉意交章論之  
坐左遷南京工部員外郎會吉去召還復職陞少詹事  
兼侍讀學士尋擢禮部侍郎陟尚書時崔志端以樂舞  
生為同官昇每裁抑之御史楊儀之子從禮曹游偶遇  
昇撻之儀遂劾昇言官爭相論列致仕加太子太保逆

瑾時復起為尚書為晉藩事忤瑾意奪加官卒贈太子太傅謚文僖廖道南曰予觀南城志謂昇宦業益懋凡考祀典擇賢才禁奢靡重名器省供應可身任者次第行之及攷國史則又力詆其狀如此豈名實不相副耶贊曰南城二史啓昭景鳴啓昭嬋姁景鳴崢嶸揆之古昔曾鞏李覲二賢往矣誰其克紹

侍講學士晉工部尚書董越

董越字尚矩江西寧都人成化己丑進士及第授編修

轉侍讀甲辰選侍東宮講讀充經筵講官弘治改元遣  
右庶子兼侍講孝宗登極詔使朝鮮宣布德意却其餽  
遺有賦以紀其國俗預修憲廟實錄陞太常少卿兼侍  
講學士充日講官尋擢南京禮部侍郎陟工部尚書卒  
贈太子少保謚文僖越修眉長身博洽善議論成化末  
諸執政大臣不相能其門客各有所厚獨越出入諸公  
之門皆得其歡心議者以是少之子天錫仕至大理卿  
李文正公銘其墓曰謂成之艱殊若易然東隅桑榆惟

公有焉謂壽之艱而不其然坦途推車抑又誰愆虧盈  
益謙天道則有栽培傾覆人所自取數勿或值理則可  
守其所未竟以遺厥後廖道南曰予觀寧都志稱越清  
介端謹館閣推重然讀文正公之詞似若有憾焉而史  
亦不之褒也贊曰金精凌雲山祇儲積慶化澄清水若  
鳩靈乃誕董君為國重臣胡然而然國史有評

侍讀學士拜禮部侍郎費閤

費閤字廷言鎮江丹徒人成化己丑禮部會試第一選



庶吉士授編修丙申充經筵官丁酉遣國子司業丁未  
轉左諭德仍理司業事戊午陞祭酒孝廟初開經筵充  
講官車駕視學賜坐講爨倫堂褒諭宴資士林榮之及  
直日講改少詹事兼侍讀修憲廟實錄成進詹事兼侍  
讀學士越月擢禮部侍郎卒年五十有八閭長身偉貌  
論議疊出臨事通變慷慨且恭謹自持人恒以公輔期  
之其在國學最久士子多所造就倪文僖公撰神道碑曰  
江東有木梗與章根蟠厚地摩青蒼匠石睥睨喜欲狂

萬牛必致歸明堂輪囷磅礴登巖廊巍然屹立時之望  
風雨侵陵蠹且傷用之未久嗟淪亡廖道南曰夫太上  
立德其次立功其次立言史稱閭恭謹近於有德者而  
議論亹亹又何能言也豈所謂三者無一於是耶贊曰  
大江東來趨于丹徒兩峰水殿三茅天都峨峨費君幼  
有壯圖侃侃閭閻雄蓋萬夫

禮部尚書兼學士吳寬

吳寬字原博蘇州長洲人初以貢入太學督學御史陳

選惜其才令就試登應天魁選成化壬辰會試廷試皆  
第一授修撰秩滿遷右諭德充東宮講讀官寬上疏勸  
講聖學無分寒暑孝宗嘉納進左庶子兼侍讀預修憲  
廟實錄成陞少詹事兼侍讀學士尋擢吏部侍郎守制  
服闋召入典誥勅修會典充副總裁書成陟禮部尚書  
兼學士仍典誥勅孝肅太皇太后祔廟詔議其禮寬獨  
引周姜嫄事請別廟奉享或議吳澄不當從祀寬謂有  
益經學議上俱從之卒贈太子太保謚文定官其子奭

為中書舍人李文正公銘其墓曰維世有望間不容偽  
上有廷論下則輿議遠且賤者惟彼奴隸彼懵不知孰  
強而致其所自致匪爵匪位矧其兼之功詎云易惟王  
不朽公亦有二有德有言功則未既廖道南曰予觀吳  
志謂寬靜重醇實自少至老人不見其過不為慷慨激  
烈之行亦未嘗碌碌苟隨既而觀國史稱寬行履高潔  
志操純正勢利所在退避若懦蓋其所得者深矣贊曰  
人有恒言老成典刑士林著蔡策府權衡惟匏菴公者

德碩人沉渾確實有典有文文正有銘文定有評書之  
琬琰無愧名臣

侍講學士拜兵部尚書楊守趾

楊守趾字維立文懿公守陳之弟也成化戊戌進士及  
第授編修秩滿轉南京侍讀弘治紀元預修憲廟實錄  
充經筵官辛亥遷左諭德乙卯進侍講學士戊午侍皇  
太子于東宮尋擢南京吏部右侍郎庚申攝南京兵部  
事因災異疏陳時政辛酉攝南京國子監事卹生徒清

吏弊人咸稱之壬戌考績入京預修會典充副總裁書  
成轉左侍郎加尚書致仕卒贈太子少保守陞性耿直  
為諸生時上書論救祭酒陳鑑邢讓司業張業有何蕃  
石大用之風從兄守隨為工部尚書守陳為吏部侍郎  
從弟守隅為布政使從子茂元為刑部侍郎茂仁為按  
察使一門貴盛當時莫與儔云李文正公銘其墓曰四  
明山高東南長二川交流滙其旁中結靈秀成文章前  
有一樓後二楊文懿多聞天下望公也奮翼相低昂天

予置之白玉堂兩都官重登巖廊五色共補山龍裳政  
皆弗竟文則昌終如莫邪會干將廖道南曰予讀碧川  
文稿其論天下事若指諸掌略無依阿腆臆而耿直孤  
抗蓋其得于家庭者多矣贊曰謹言不諱國是惟賢直  
氣不回士節則堅金紫盈門圖書滿筵誰珥彤管願續  
青編

侍讀學士晉南京兵部尚書張潔

張潔字仲湜廣西全州人成化戊戌進士選庶吉士授

編修弘治己酉轉侍講戊午充東宮講讀官辛酉主考  
順天鄉試己丑進侍讀學士武宗登極陞學士遣國子  
監祭酒正德丁丑擢禮部侍郎己巳陟南京禮部尚書  
辛未改南京戶部又改吏部時儲位久虛濂率同儕請  
建太子言甚剴切甲戌改南京兵部參贊機務條陳八  
事又奏革守備廳冗官凡百推用不容請託人皆服其  
公乙亥致仕加太子少傅卒濂性剛褊與人多不合其  
在戶部清查遠年逋賦論者謂劉瑾方事督責而濂多



附之及瑾誕日以金壽星為獻潔後及詳辨未可知也  
石文隱公銘其墓曰奕奕留都大江為池不有虎臣孰  
張王師公總機務惟善是力望之巖巖千仞其壁固我  
藩籬人莫敢窺汲也難惑范乎可欺三軍易奪萬夫吾  
往是謂理勝非以力强人曰惟公有統馭才公在經筵  
天日可回人曰惟公以嚴盡職公在胄監養士以德抱  
直而行積信以施違道干譽公亦咄之公雖云亡有不  
朽存湘山峨峨以固其源廖道南曰予師石文隱公剛

介士少許可而於潔極其稱譽非有所試耶贊曰桂林之許湘水清漪星崖風洞幽真所栖竹所金川後先挺奇人之軒輊莫敢我欺

學士晉南京禮部尚書江瀾

江瀾字文瀾浙江仁和人成化戊戌進士選庶吉士授編修弘治戊申預修憲廟實錄轉侍讀甲寅充經筵講官是冬冊封荆王乙卯典應天鄉試丙辰簡侍東宮講讀拜文幣金帶之賜庚申擢侍讀學士預修會典壬戌

進學士預修通鑑纂要甲子典順天鄉試乙丑遷少詹  
事魚學士丙寅預修孝廟實錄充副總裁尋轉吏部侍  
郎值逆瑾用事張綵驟握銓柄憾瀾不附己改陟南京  
禮部尚書祇肅禋祀禱雨輒應未幾卒瑾敗贈太子少  
保謚文昭所著有銓曹春亭東川瀛州諸藁廖道南曰  
予嘗友東川之子司空景熙太史景孚俱負雋才杞奇  
氣不少下人及攷其語詞則又稱其持重老成小心恭  
謹夫固有不可及者矣贊曰謙謙君子大猷允升溫溫

恭人大雅不羣緬懷幽姿幸觀厥子令聞懋昭有孚神理

侍讀學士拜禮部侍郎馬廷用

馬廷用字良佐四川西充人由鄉舉入胄監大學士邱濬時為祭酒季試諸生大加稱賞名遂大振登成化戊戌進士改庶吉士授編修丁未轉侍讀充經筵官乙卯典順天鄉試預修大明會典進侍讀學士掌南京翰林院事尋陞南京禮部侍郎致仕卒贈南京禮部尚書廷

用敦朴樂易所存鯁介臨事能斷在南京嘗攝戶部會  
江北大饑流民渡江就食者相屬獨持議發廩不俟奏  
請所全活甚多外守備官與太常議不合判數語立決  
為詩文亦華贍久居散地勇於求退士論多之子金官  
布政使龠知府廖道南曰予觀楊守趾贈馬廷用為學  
士引二程二蘇為說夫二程穆乎貞矣若二蘇亦豈易  
得哉當文莊為祭酒時已識廷用為異才厥後所造不  
逮所稱豈亦惑于流俗未反諸古耶贊曰金峨岌業錦

川浩蕩山祇水若靈氣充盎偉哉良佐有聲于時虎闥  
鷺澤莫敢參差晚陟春卿激流勇退知止知足庶幾無  
愧

學士晉禮部尚書白鉞

白鉞字秉德真定南宮人兵部尚書圭之子也成化甲  
辰進士及第授編修弘治丙辰轉侍讀己未克東宮講  
讀官進侍讀學士甲子典應天鄉試正德丙寅陞學士  
克日講官丁卯命授庶吉士業掌院事擢禮部侍郎尋

改吏部陟禮部尚書賜玉帶庚辰命兼學士掌詹事府  
事典誥勅加太子少保卒贈太子太保謚文裕李文正  
公銘其墓曰世紹科第家為公卿我自得之匪祿蔭是  
膺兄翹弟華業擅文武我以文試匪甲冑為伍士門有  
學惟經史子曰我所以任固其在此官則有職天地人  
曰帝有命我曷敢弗寅進敷講幄入掌綸誥凡有施用  
類皆文教父曰恭敏子曰文裕惟千百禩以永終譽廖  
道南曰予觀西涯所撰墓志稱鉞為人重厚政尚寬簡

不為骯髒之行瑣屑之節及讀國史謂鉞值逆瑾時多  
所遜避亦不失正其然乎其不然乎贊曰惟韓魏公忠  
彥相繼惟張魏公南軒為嗣恭敏為父文裕為子尚友  
古人庶幾在此

學士晉禮部尚書傅珪

傅珪字邦瑞保定清苑人成化丁未進士選庶吉士授  
編修弘治丙辰命兼司經司校書預修會典遷左中允  
兼編修乙丑轉左諭德兼侍講充經筵講官正德紀元



預修孝廟實錄丁卯典應天鄉試戊辰復典武舉己巳  
命授庶吉士業充日講官時劉瑾擅權降修撰尋以實  
錄成復左中允進侍講學士明年陞學士典順天鄉試  
擢吏部侍郎三載陟禮部尚書瑾初敗事多變革珪振  
舉綱維悉守成法杜絕請謁人不敢干以私嘗條陳十  
餘事不報遂致仕去卒以從子榮為後蔭中書舍人陞  
禮部主事大學士梁儲銘其墓曰嗟北潭古遺直曰為  
臣惟舉職事感中義形色言必詳行必立雖賁獲靡能

易廖道南曰予從中書省嘗見祭之為人和易溫雅及  
祭奉使長沙過予蒲野寄興高遠怡情恬愉可以想見  
北潭公也夫王謝之門多奇士房杜之後無佳兒其然  
豈其然乎贊曰和而能介剛而能潛處盡能飭處困能  
亨不激以抗不隨以遷斷斷無他北潭有焉

侍講學士晉禮部尚書吳儼

吳儼字克溫常州宜興人成化丁未進士選庶吉士授  
編修丙辰充經筵講官武宗出閣兼司經局校書庚申

轉左中允辛酉進侍講學士掌南京翰林院事正德丙寅召修孝廟實錄充經筵日講官兼修玉牒丁卯典順天鄉試時逆瑾恃寵招權儼于第二場以為臣不易命題瑾心已惡之會儼擅娶經選掖庭女子瑾益振怒是歲朝覲考覈傳旨罷之瑾誅復職未幾擢南京禮部侍郎壬申調禮部持節封益府丙子陟南京禮部尚書丁丑武宗北狩宣大偕府部大臣上疏諫不從未幾卒謚文肅廖道南曰予嘗友儼之子驥見其雅飭不矜頗有

父風及讀國史謂儼性方嚴操履勤慎居鄉有士行當官能自立瑾之媒蘖豈其然乎贊曰毘陵之澤陽羨之村樸菴為祖寧菴為孫清白相耀高華自榮夷考其行視諸史銘

學士晉禮部尚書毛澄

毛澄字憲清直隸太倉州人弘治癸丑廷試第一授修撰丙辰同考會試己未預修會典癸亥轉左諭德兼修撰預修通鑑纂要甲子侍皇太子于東宮充講讀官數

奏明暢孝宗聞之甚喜徹御前中秋宴以賜之乙丑武  
宗登極擢左庶子兼侍讀賜金廩束帶預修實錄值內  
艱歸逆瑾柄國奪所陞秩瑾敗起復仍官侍讀庚申進  
侍講學士典順天鄉試九月署國子監事辛未充廷試  
讀卷官擢學士充日講官壬申掌院事教庶吉士讀書  
甲戌主考禮部會試尋陞吏部侍郎丁丑進階通議大  
夫陟禮部尚書值武宗南巡公上疏諫阻兵部尚書彭  
澤坐哈密事將置重典公預廷議首救免之己卯賜蟒

衣玉帶逆濠就擒江彬擁邊兵邀駕駐通州命文武大臣出迎人人自危公倡正議謂當訊馘告廟悉從之辛巳四月同駙馬都尉崔元奉迎今上于郢邸賜白金千鎰綵段十襲預修武廟實錄充副總裁加太子太傅冊立中宮皇后充副使持節行禮未幾以議禮弗協乞休卒于興濟舟中贈少保謚文簡子希元為都事廖道南曰文簡公與先大夫五洪公為同榜及予小子就試禮闈公與宗伯知貢舉雅知素履為詳既而讀邵二泉所

撰行狀稱公資性明粹神采秀朗容止莊潔平生言行  
無少偽犯而不校遇事正直不以利害少屈濟物薦賢  
恒如不及而未嘗自言於乎非知之深者不能言之至  
此切也贊曰才為國華大廷之魁德為國範太古之儒  
貌不勝衣言不出口勲載宗社名齊山斗偉哉若人真  
我父師敬誦遺訓若寶著龜

殿閣詞林記卷五



欽定四庫全書

史部

殿閣詞林記卷八

六至

詳校官侍讀<sub>臣</sub>陳萬青

刑部郎中<sub>臣</sub>許兆椿覆勘

總校官進士<sub>臣</sub>繆琪

校對官編修<sub>臣</sub>莊通敏

謄錄監生<sub>臣</sub>鄧捷成

欽定四庫全書

殿閣詞林記卷六

明 廖道南 撰

館學

弘文館學士封誠意伯劉基

劉基字伯溫浙江青田人年十四即領春秋大義元至順癸酉以明經舉進士授高安丞揭文安公曼碩一見奇之曰此魏徵流也而英特過之他日其濟時之器乎

初基游燕京見書肆有象緯占經閱之經夕談誦如流  
其人大驚欲舉以授之基辭曰業已習矣及丞高安有  
進賢鄧祥甫者精於天文術數廼以其學授基焉治高  
安有能聲江西行省辟掾史基辭去尋起為江浙儒學  
提舉又辭去嘗與魯淵字文公諒泛西湖有異雲起西  
北祥光掩映湖波如綺諸人皆賦詩記之基獨縱飲不  
顧徐呼曰此天子氣也應在金陵十年當有王者起其  
下我當輔之衆駭以為狂悉舍之去基獨與門人沈與

京劇飲湖亭時無能知者惟西蜀趙天澤以為隆中諸  
葛也方國珍起兵海上元帥多爾濟巴勒被其誘脇省憲  
遂舉公為帥府都事基募兵平山寇吳成改行樞密院  
經歷與叅知政事舒穆魯宜孫守處州以拒國珍遷行省  
郎中經畧使李國鳳上其功執政者貪得國珍賂遺奏  
入不省授以判官基又辭去歸青田山中乃著郁離子  
書我高皇帝取婺州遣孫炎聘基基指乾象謂人曰此  
天命也吾其行乎甚至金陵上時務十八策上嘉納之

會陳友諒入寇或謀以城降或以鍾山有王者氣欲起據之上問基曰先生以為何如基曰先斬主降議及奔鍾山者乃可破賊爾上曰先生計將安出基曰天道後舉者勝若散府庫開至誠以固士心伏兵伺隙擊之取威制敵在茲一舉已而友諒至果大敗走復將討友諒于九江基曰金星在前火星在後克之必矣上大喜即出師攻皖城自旦至晡不拔基請徑趨江州遂拔之友諒走湖廣其洪都守將胡廷美遣子約降預請禁約數

事上有難色基自後踢所坐胡床頓悟許之廷美以城  
降先是嘗遣都督馮勝出攻基授以方畧俾夜半候望  
青雲起則我兵宜伏見黑雲則彼寇兵伏也慎勿妄動  
黑雲漸薄與青雲接此寇歸也宜急追之果如所料基  
以母富氏喪奔歸過衢州值苗軍叛殺守將胡大海耿  
再成孫炎等夏毅時守衢城驚懼失措基徐為畫計且  
諭諸軍以禍福衆乃定遂與平章邵榮擒苗帥賀李等  
克復諸城方國珍素畏基名遣間致書問基因宣布威

德諷使歸順方氏納款上遣人訪基以軍國重事基隨問條答悉合機宜及還都道經建德會張士誠寇其城守將李文忠欲奮擊之基曰不出三日賊可成禽也比三日鷺明基登城望曰賊走矣趨使疾追至東陽悉禽之基至入謁上問曰友諒據楚士誠據吳二者孰先伐之便基曰友諒居上流名號未正宜先伐之友諒既平取士誠如囊中物爾已而友諒復攻洪都上親征之大戰于鄱陽湖勝負未決基密謀移軍湖口以金木相犯

日制勝上皆從之陳氏平遂決計伐士誠暨北定中原  
基運籌居多上時至基所屏人語移時乃去人莫知之  
乃以基為太史令一日基見日中有黑子奏曰東南當  
失一大將時叅軍胡深征閩果覆沒他日上欲刑人基  
曰何為乃語以所夢基曰三人頭上有血此衆字也以  
土傳之得土得衆之象也後三日當有驍越三日海寧  
果以城降上大喜悉以所留刑者俾基縱之是年熒惑  
守心羣臣震懼基勸罪己以回天意上即詔諭羣臣人



心始安值大旱命基獻滯獄多所平反天降澍雨張昶  
上請羣雄既平宜及時為樂基曰是欲為趙高也昶色  
動乃使齊翼巖等伺基欲中之傷上廉得其情昶翼巖  
伏誅未幾為御史中丞兼太子贊善大夫上北巡命丞  
相李善長及基留守京師且敕以督察奸惡以肅輦轂  
基素剛嚴凡中書內府闈人吏胥有犯即捕治宦者監  
工匠不肅及宿衛舍人奕基基啓皇太子悉寘於法有  
中書都事李彬者犯法基即廢之善長祈緩其獄弗得

遂銜之上還都基言曰鳳陽固帝鄉非天子所都之地  
雖置中都不宜居也庫庫特穆爾雖可取然未易輕視  
願留意基辭歸青田適章溢奏定處州田稅上命減稅  
畝止五合且曰使劉伯溫子孫世爲美談也厥後定西  
失利庫庫特穆爾北走沙漠上乃手詔召基畧曰爾從  
朕於羣雄未定之秋居則匡輔治道動則仰觀天象察  
列宿之羅布驗日月之光華發蹤指示無征弗克攻皖  
城拔九江撫饒郡降洪都取武昌平處州爾多力焉至

於彭蠡鏖戰砲聲如雷鬼神悲號星日晦冥自旦至暮如是者四爾時在舟中備嘗患難今久而未至朕心慊焉命駕一來朕心良慰基至上欲拜之爵基曰陛下乃天授臣何敢貪天功固辭不拜上以事詰責丞相善長基曰善長勲舊且能輯和諸將上曰是數欲害汝者汝反爲之地耶汝之忠勲足以任此基曰譬如易柱必得大木若用小木爲之將速顛覆如臣駕鈍尤不可爾上欲相楊憲基與憲素厚乃直言曰憲有相才無相器夫

宰相者持心如水以義理爲權衡而已無與焉者也今  
憲不然能無敗乎上曰汪廣洋何如基曰器局褊淺觀  
之可知上曰胡惟庸何如基曰彼小犢爾將償轅而敗  
犂矣上曰吾之相無踰於先生基曰臣非不自知但臣  
疾惡太深不任繁劇爲之且孤厚恩天下何患無才願  
明主悉心求之如目前諸人臣誠未見其可上嘗與論  
兵曰克敵在兵制兵在將兵無節制則將不任將非其  
人則兵必敗是以兩軍之間決死生成敗之際有精兵

不如良將基曰臣每觀廟筭初謂未必皆然及摧鋒破敵動若神明臣由是知將之勝又不若主之勝然陛下不拘古法而勝尤人所難上曰兵者謀也因敵制勝豈必泥於古哉戰陳之事闔闕奇正頃刻變化如風雲之無常勢要在通其變爾三年七月以爲弘文館學士十一月大封功臣拜誠意伯錫之誥命追贈其祖父皆永嘉郡公四年正月賜歸田里遣子璉赴闕謝恩并上平西蜀頌上手書優答且問以天象基覆上言霜雪之後

必有陽春今國威已立宜濟以寬上命以其書付之史館或有言殺運三十年未除者基歎曰吾若當國掃除弊俗一二年後寬政可復也初甌括間有隙地曰談洋基言於上以為頑民負販私鹽因挾方寇為亂宜設巡檢司上從之及設巡檢司民以為非便適茗洋作亂郡縣匿不以聞基令子璉奏之時胡惟庸柄政憾其所奏乃謂基圖談洋為已墓地詔以基勲舊赦弗治仍奪其祿先是楊憲敗後汪廣洋為相復敗胡惟庸繼之基大

感曰使吾言不驗蒼生福也如其驗諸其如蒼生何八年正月胡惟庸以醫來視疾飲其藥二服有物積腹中如石基白於上亦未之省也乃御製文一通遣使送歸及家一月而薨年六十有五所著有覆瓿集寫情集及犁眉公集廖道南曰予觀誠意伯集慨然激嘆以爲有子房之風及誦我聖祖之言亦曰吾子房也夫子房椎擊沙中何異於伯溫之憤方氏也伯溫受天文於鄧祥甫又何異於圯上老人之三畧哉漢之元功大封子房

顧封畱足矣乃辟穀導引明哲保身始神黃石之術終  
從赤松之游易曰介如石不終日貞吉何其智也而伯  
溫乃徘徊容與雉罹于羅象以齒焚豈其忠於國而弗  
智於身耶彭韶贊曰治淪於弱曷仕於時爰歸盛德仕  
止乃宜就桀就湯節義奚虧大哉王佐燭物炳幾運籌  
制勝翼龍以飛昭回制作文章是咨允爲宗臣爾爵爾  
祠

弘文館學士羅復仁



羅復仁字

原闕

江西吉水人初從陳友諒為編修甚見

禮遇歲壬寅太祖高皇帝兵至九江復仁來降命侍左右癸卯從破友諒于鄱陽湖命齎蠟書招諭臨江袁州諸郡甲辰除中書省諮議性率直每論事指陳得失無所隱避益親信之及武昌久圍不下上以復仁友諒舊臣令往招諭其子理復仁至城下號慟不已理怪之使召之入復仁曰今不降大兵且屠城諸民何罪早為之所則族可保也理由是遂降復招諭江西還為國子助

教以老賜車出入每宴見賜坐飲食丙午春奉使山西  
招諭元將庫庫特穆爾前使多被拘留復仁議論慷慨  
獨還洪武元年擢編修二年冬齎詔諭安南命毋侵占  
城既至曉以大義安南王忱服還贈以黃金美玉復仁  
辭不受歸奏之上多其廉讓適安南使者至仍令持之  
以歸改翰林檢閱未幾拜弘文館學士屢召論復仁多  
土音質俚上以其率直多見聽納尋乞休賜大布之衣  
書曰性雖粗率忠直可嘉賜爾布衣放歸田里仍賜玉

帶名馬鐵柱杖坐墩諸物上嘗幸其第復仁方操塗具  
急呼其妻取瓮故上每呼為老實羅云廖道南曰馬援  
有言非惟君擇臣臣亦擇君夫中原鼎沸綱紀隳壞而羣  
雄角立未知鹿死誰手復仁乃能辭其故主珥戴真龍  
推心置腹直見本真綸綍寵褒非溢美也贊曰朴而不  
浮慙而有真却金知義賁布知仁玉帶溫栗鐵杖堅貞  
大哉奎章照耀山城

弘文館學士危素

危素字大朴撫州金谿人年十五能究五經大旨與同  
郡葛將曾堅黃暉更相策勵乃從吳沉范梈遊遂知名  
薦入經筵為檢討歷陞學士承旨奏請加封朱考亭楊  
龜山李延平真西山蔡九峰從祀俱從其論國初徐達  
叔燕京令故臣咸投告身素與編修黃暉誓死於難有  
報國寺僧梓者救之乃免而暉竟死矣達乃以素歸上  
雅聞素文學仍命為侍講學士因進言宋朝諸陵為元  
西僧所發以理宗頂骨為飲器上聞之惻然曰宋南渡

諸君無大夫德與元又非世讐既乘其弱取之何乃縱  
奸人肆酷如是耶即命守將吳勉訪索頂骨得之僧廬  
命有司厝於京城之南紹興亦以永穆陵圖來獻命掩  
瘞故處時值甘露降宋濂為頌上問素此何徵也素曰  
王者愛養耆老則甘露降而松柏受之尊賢容衆則竹  
蓂受之今甘露降於松是陛下養老所致也宜以制幣  
冊告宗廟頒於史館以永休聞三年四月命素及胡鉉  
睢稼王大中俱為弘文館學士鉉歸素撰皇陵碑以獻

上念其老賜小車免朝謁時從論說經史質証疑義御史王著等劾素亡國之臣不宜居侍從乃謫居和州之含山所著有宋史稿元史稿文集五十篇奏議三卷宋濂銘其墓曰大明方隆多士景從有詔任公侍講禁中公文之純大音玄酒道則在茲爵祿何有孰高為山孰深為淵文之有傳終古昭宣廖道南曰素仕元秉文衡都樞要學者仰之如星鳳及徐達收燕薊命仕元者投告身素與編修黃昇約死於難昇死而素背約焉及至

躋顯榮陟清華愧東閣之履聲慄南滌之汗顏竟自經  
於溝瀆而不之恥莊生有言哀莫大於心死素之謂矣  
贊曰華國之才救時之畧其學博雅其操簡約鳥則擇  
木魚則依水爲臣不二有負斯語

宮學

左春坊大學士董倫

董倫字安常順天宛平人所學浩博沉潛學者從之稱  
爲貝川先生洪武十五年張寧以明經薦入朝奏對稱

旨授春坊贊善大夫侍懿文太子陳說剴切高皇帝嘉之未幾補河南叅議二十五年改詹事院爲府遴選東宮官屬以唐鐸爲詹事祝春李文吉爲少詹事而以倫爲春坊大學士倫薦葛伯衡代已三十年以註誤坐事謫雲南教官皇太孫憐之賜白金爲道里費倫涉淮溯汴驅馳梁雍以達於蜀蜀王聞而重之賦詩八章以贈其行時雲南初開倫以身教用夏變夷遠人嚮慕建文中召入爲禮部侍郎兼學士階嘉議大夫御書怡老堂



三大字及髹几玉鳩杖各一倫上表略云臣素無闕閱  
功勞兼乏智能才藝徒知篤信于古道自分無用于明  
時幸蒙高皇帝之知忝拜左春坊之命任臣以兩宮  
輔導之職稱臣為三葉帝王之師茲者踐阼之初乃復  
馳書以召蒼顏白髮萬里來歸金馬玉堂十年如昨自  
今持杖戒噎則思兆民或阻于飢凭几安身則念一物  
或失其所乃方孝孺代撰也先是解縉代夏長文章奏  
劾都御史袁泰謫河州至是倫薦之召還為待詔其汲

引士類如此廖道南曰予觀順天志稱倫端厚實實及  
考諸國史乃知其歷履夫方遜志解春雨皆名儒也或  
代之撰表或受其薦剡其人品高尚可徵也已贊曰真  
人啟運哲士景從獻策彤廷授經青宮出補大藩入司  
坊學侃侃大節卓彼先覺

左春坊大學士李至剛

李至剛名銅以字行浙江寧海人少從楊鐵崖游洪武  
初以明經舉侍懿文太子初授祠部試郎中坐事謫

戊邊未幾召還為虞部郎中尋補河南叅議會河決汴  
堤以匡濟調湖廣叅議太宗登極至剛來朝擢右通政  
預修高廟實錄陟禮部尚書甲申冊立皇太子命至剛  
兼左春坊大學士初開經筵同解縉進講及修永樂大  
典多所裁定侍郎宋禮劾之降儀制郎中及縉被譖  
詞連至剛下詔獄仁宗嗣位復以通政改守興化府卒  
子源中永樂甲辰進士廖道南曰予讀楊文貞公所撰  
至剛墓表稱其入典邦禮輔儲君出佐藩翰守名郡顯

庸光大雖間歷夷險然回視同儕輩覆滅消亡何可勝  
計蓋指縉也及攷縉所評至剛語曰誕而附勢雖才不  
端太宗後舉以告仁宗曰至剛朕洞燭之矣縉語有微  
非狂士也於乎豈士奇亦忌縉耶贊曰崛強此老敷歷  
居多屢遭奇禍弗罹于羅大紳少之文貞則多聖謨如  
在人其謂何

右春坊大學士魯榮

魯榮字子啓江西永豐人永樂甲申進士第一授修撰

軀儀膚碩問學敏瞻太宗奇其才命解縉選二十八人  
為庶吉士進文淵閣榮為之冠上嘗召問榮應對如響  
命撰天馬海青歌揮筆立就詞氣豪宕預修永樂大典  
充副總裁官丁亥轉侍講守制車駕幸北京起復扈從  
同邑有生建文間黨繫者人咸為榮危又所居西長安  
門失火延及禁垣上皆以榮故不問秩滿進侍讀學士  
重修高廟實錄成駢沐賜賚仁宗嗣位遷右春坊大學  
士仍兼侍讀階奉議大夫宣德改元預修兩朝實錄成

賜金織襲衣寶帶擢少詹事仍兼侍講學士卒贈禮部  
侍郎楊榮銘其墓曰永樂初科首賜及第玉質金聲為  
國令器居官翰苑克慎克勤文行之懿遠近著聞廖道  
南曰予觀國史謂榮溫雅英邁喜推薦士學博才曠為  
文沛然惜乎天不假之以年未究厥終也贊曰渥注神  
駒奔風逸電丹穴威鳳雲輝星爛子啟之才夙自天成  
大廷擢魁官府垂名天奪之速齋志以沒長篇大章照  
耀石室

詹事兼侍讀學士李泰

李泰字文通順天香河人正統戊辰進士選庶吉士授  
編修景泰間遷左春坊司直郎兼編修再轉右中允英  
廟復辟改尚寶司丞兼編修既而侍東宮講讀轉侍講  
成化改元陞侍講學士兼經筵官尋侍文華日講預修  
英廟實錄成陞少詹事兼侍講學士未幾進詹事兼職  
如故卒年四十三賜祭塋贈禮部侍郎太監李永昌泰  
之伯父也正統中掌章奏有寵泰為其後初應鄉試

京尹進錄英廟問左右李泰中否見其名甚喜及官翰林頗知向學矜已自足性狷僻與人寡合而所與者則相朋比汲引士論以是薄之廖道南曰予讀小說家見唐有皮思謙者冒中常侍魚朝恩之寵登高科歷顯仕未嘗身為其後獲居宥密如李泰者也嗟乎翰林清要貴重匪宿儒不可以斯人踐斯地豈非予殿閣師濟之辱乎贊曰曹瞞後騰思謙冒思史局溷處掖庭與援泰也雖才歷試則愆鵠蹲鳳池有汗斯顏



吏部侍郎兼侍講學士楊守陳

楊守陳字維新浙江鄞縣人景泰辛未進士選庶吉士授編修預修一統志轉侍講憲宗登極充經筵講官一日講尚書武成篇守陳曰古稱舜無為而治武王垂拱而天下治蓋聖人勞于求賢佚于得人後世人主深居禁中委政內侍者召望夷之禍高拱無為肆情嬖豔者啟祿山之變孟子所謂安危利害此之謂也時中官梁方及昭德萬妃有寵故守陳及之聞者悚然未幾遷司

經局洗馬進侍講學士孝宗出閣命侍講讀時議憲廟  
升祔禮守陳上言古者天子七廟祖有功宗有德凡號  
太祖者即始祖當尊以配天若商周之契稷則又以功  
論不以統論也宋之僖祖可比商報乙周亞圉非契稷  
比議者徒取王安石之說遂使七廟之間既有始祖又  
有太祖既以配天又不正南向之位名與實乖皆非禮  
也今升祔憲廟請并祔德懿熙三祖自仁宗以下為七  
廟異時祧盡則以太祖擬商周契稷而祧主藏于後寢

祫禮行于前廟時享則尊太祖祫祭則尊德祖各不失尊  
庶無悖禮執政不能從及修文華大訓成陞少詹事仍  
兼侍講學士守陳上言二事其一請開日講云陛下一  
日御文華殿之時多處乾清宮之時少則欲寡而心清  
惑少而理明得于內者純出治之本立矣其二請御午  
朝云大政則召大臣面議未當則許諫官救正俾賢才  
常集于目前視聽不偏于左右資于外者深致治之綱  
舉矣若如近日凡百題奏付內監調旨批荅臣恐積弊

未革隱禍已深不但如目前所慮而已上褒荅之未幾  
擢吏部侍郎兼詹事府丞專典史事英廟實錄充總  
裁官踰年卒贈禮部尚書謚文懿何喬新叙其集曰  
文懿載筆蘭臺讎書延閣侍講經幄輔導儲宮三十餘  
年自六經諸史旁及九流靡不探源綜要故其發于文  
也法度森嚴如龍虎鳥蛇布立于行陣意態閒雅如朱  
絃赤鳥周旋于殿陛其閎深雄放又如彭蠡驚濤龍門  
駭浪浩乎淼乎不可狎玩也王鏊誄之曰聖亡經在異

說紛兮阮秦造漢離多門兮商詩瞿易授受親兮黨同  
矜異傳失真兮遺言與旨不尚存兮唐有啖趙宋孫石  
方抱經刻傳挺見特兮逮乎伊洛義轉精兮紫陽承之  
集厥成兮設科置學為世程兮父傳師授莫知其端兮  
雖有異說誰敢干兮於文懿公生已後兮周漢唐宋得  
通究兮聖經浩浩如天淵兮家鑽人淬庶或全兮瑰辭  
微義日星陳兮取信何傷益自珍兮嗟我何知乃得師  
兮謂公自信當勿疑兮太羹玄酒所貴希兮豈不或過

志亦奇兮後千萬年來者誰考  
廖道南曰予讀文懿桂坊金坡諸稿固已異之及觀國史謂其恬靜易直仕雖齟齬而守正不變彭韶贊曰無思不通無書不讀講章震主聽者悚服羨彼世光袍笏滿床有三尚書有六桂坊吁嗟我公直筆如競奏草已具死不目瞑

少詹事兼學士柯潛

柯潛字孟時福建莆田人景泰辛未進士第一授修撰明年遷右中允丙子寰宇通志成轉司經局洗馬天順

丁丑改尚寶少卿兼修撰己卯侍東宮講讀憲宗踐阼  
擢學士掌院事授庶吉士業誠心訓迪士多造就凡百  
廢弛悉加振作人以是多之預修英廟實錄成陞少詹  
事兼學士成化戊子充日講官守制歸適祭酒缺廷議  
會舉詔起復之潛力辭不起卒潛為人高介有氣節遇  
事不苟故今詞林諸士尚呼為柯竹崑云楊文懿公叙  
輓集曰孟時姿儀德器才識文學真出人表且秉史筆  
典文衡視院篆侍講幄茂著勞望士方仰之若山嶽民

具望之作霖雨天胡奪之速耶廖道南曰予游翰林見  
有亭一區曰柯亭有栢二株曰柯學士栢何其流風遺  
澤令人永矢勿諼也蓋其孤介之節剛正之氣所漸被  
者遠矣贊曰壺山之陰蘭水之陽倫魁夙兆宮端潛光  
竹巖流清栢亭垂芳有斐君子終焉允臧

詹事兼學士程敏政

程敏政字克勤徽州休寧人生而蚤慧侍父襄毅公官  
蜀巡撫侍郎羅綺以神童薦英宗召至便殿試以春聯



應對如響館閣覆試賦聖節及瑞雪詩并經義援筆立  
就詔詣翰林讀書李文達公妻以女成化丙戌進士及  
第授編修預修英廟實錄秩滿轉侍講及修宋元綱目  
敏政自撰宋史受終考大學士彭文憲公稱之遷左春  
坊左諭德充經筵講官乙未廷試讀卷丙午主考應天  
鄉試孝宗登極陞少詹事兼侍講學士充日講官時詔  
議從祀孔子禮敏政上言聖王治天下以祀典為重故  
有功德于一時者一時祀之更代則已有功德于一方

者一方祀之踰境則已况孔子功德在萬世必文與行  
兼名與實副者乃可以從祀若戴聖身陷賊吏劉向喜談  
神仙馬融為梁冀草詔殺李固何休解春秋黜周王魯  
王弼何晏倡為清談王肅佐司馬昭篡魏杜預為吏不  
廉為將不義得罪名教類當黜祀䟽上會御史魏璋以  
曖昧中傷之致仕歸郎中陸容給事中楊廉辯其寃上  
召之還擢太常卿仍兼前職教習庶吉士預修玉牒乙  
卯守制歸服闋詔修會典充副總裁官轉詹事兼學士

尋陞禮部右侍郎掌詹事府事侍皇太子講讀己未主  
考禮闈給事中華昶劾之詔廷辯昶語塞坐罪敏政致  
仕卒贈禮部尚書所著有皇明文衡瀛賢奏對儀禮定  
本新安文獻志宋遺民錄諸書廖道南曰予為兒時竊  
觀篁墩文集浩乎其莫禦及予謫居徽上登齊雲望紫  
陽訪其廬吊其墓想見其為人蓋一代之豪也而卒被  
誣以死當國者寧不有遺憾耶贊曰黃山巖壑萬仞干  
霄練水渟泓百川怒號惟彼齊雲紫翠崑崙生英乂

卓哉人豪磊落高邁天風海濤撰述紬繹璽絲牛毛青  
蠅貝錦見現則消誦述遺編德音孔昭

詹事兼侍讀學士陸簡

陸簡字廉伯常州武進人成化乙酉鄉貢第一明年進  
士及第授編修秩滿轉侍講預修宋元綱目成遷右諭  
德充東宮講讀官弘治紀元召修憲廟實錄陞右庶子  
兼侍讀充經筵日講官辛亥擢少詹事兼侍講學士甲  
寅以日講勞特陞詹事兼侍讀學士踰年卒贈禮部右

侍郎簡姿貌秀偉少有俊才頗不自檢晚益矜誇自負  
當遠到既久滯不顯亦多鬱抑齎志以沒李文正公銘  
其墓曰文以奇勝耻弗已出持堅敵強孰能我屈中所  
自負觸事研發有銘弗施飲志而沒若在冶金久乃成  
質器之斯艱恒百斯一成斯棄斯嗟彼造物謂天默默  
孰爾揭揭廖道南曰予友水南張學士謂陸龍臯氣蓋  
萬夫才雄一時及接其子煥章諸郎咸有父風予過武  
進乃得訪其幽蹤遺跡蓋志大而術疎者也贊曰矯矯

龍臯淵淵鳳池夙負英氣冥繹玄思麗藻所裁信史誰欺徵羣公子永世有詞

吏部侍郎兼學士掌詹事府事張元禎

張元禎字廷祥江西南昌人天順庚辰進士選庶吉士授編修憲宗登極禎上言三事一曰勤聖學二曰公聽政三曰廣用賢上嘉納成化丁亥謝病歸二十餘年潛心理學士子多從之游孝宗即位召修憲廟實錄轉左春坊左贊善上疏論王道幾萬言己酉主考應天鄉試

辛亥陞侍講學士掌南京翰林院事疏侍母養歸九年  
召修會典充副總裁書成進學士壬戌遷南京太常卿  
癸亥召修歷代通鑑纂要改太常卿兼學士甲子命掌  
詹事府事上疏請觀太極圖西銘諸書上亟命內閣取  
觀之未幾擢吏部侍郎兼職如故元禎為人孤峭奇拔  
其所交游若天台陳選南海陳獻章豐城羅倫江浦  
莊昶皆一時名士也李文正公銘其墓曰木生在山久  
乃益堅輦至于途蹶萬牛以顛貢之明堂將棟將梁忽

內蝕以傷孰其生之而棄厥良人才實殊公負其有唯  
厥攸負曰可與大受與不在天受不在予夫苟不自愧  
遑卹其誰維文之絕惟名之揭彼利達者疇巧疇拙地  
靈人傑惟鄉邦之哲百世之下山不泐水不啗惟張東  
白之穴廖道南曰予嘗讀東白集若彭蠡奔濤匡阜飛  
壑不可蹤跡及觀國史則又有不滿人意者於乎豈其  
才高見忌耶贊曰匡阜之涯羣峰蜿蜒彭蠡之濱衆派  
淪漣東白學古襟嶽帶湖煙雲鳳標星斗龍圖西涯有



碑守溪有志於乎已矣令名不世

禮部尚書兼學士劉春

劉春字仲仁四川巴縣人成化癸卯鄉試第一丁未進士及第授編修弘治辛亥轉修撰庚申充東宮講讀官秩滿遷左諭德癸亥預修會典進侍講學士正統紀元陞學士辛未擢吏部侍郎充經筵日講官明年陟禮部尚書占城世子失國竄居邦都郎請封春曰春秋公孫青尚不辱命于衛況天朝乎疏上已之又明年改南京

吏部尚書辛巳調禮部尚書兼學士典誥勅掌詹事府  
事卒贈太子太保諡文簡子彭年舉進士為督學副使  
今擢都御史延年蔭中書舍人禮部主事孫起宗戊戌  
進士大學士楊廷和銘其墓曰重慶先達曰蹇忠定文  
簡繼之煒煒輝映其始從事史局講筵隨試自效職業  
罔愆四典三禮秩亦屢遷法守是慎不比于權召自留  
都司帝之制行將大受叅預政事諧于庶明以贊新治  
胡進之難胡奪之易廖道南曰予為庶吉士時東川公

方起赴闕見其醇雅篤厚有古人風方擬樹教秘書省  
未幾而亡石齋之銘豈欺我哉贊曰峨岷嶹嶹灝灝淵  
渟忠定先奮文簡後征恂恂其貌翼翼其心兩川黎老  
茲其典刑

禮部尚書兼學士李遜學

李遜學字希賢河南上蔡人成化丁未進士選庶吉士  
授檢討弘治丙辰出補浙江僉事以憂去服闋陞陝西  
副使又以憂去起復改山東前後更三任俱督學政所

至務崇寬厚頗得士心正德戊辰召入為太常少卿提  
督四夷館仍兼侍講尋擢戶部侍郎提督太倉禮部侍  
郎乙亥陟南京禮部尚書丙子以慶賀入京調禮部明  
年兼學士掌詹事府事典誥勅命授庶吉士業卒廖道  
南曰予計偕時嘗過蔡之故墟訪春秋列侯故蹟及式  
公之間無恙也既而入讀中秘書而公已不作矣贊曰  
上蔡之先寔惟申伯迄今百祀誰復繼絕峨峨宗伯赫  
赫宮端簪纓輝映不愧南冠

廡學

侍讀學士拜祭酒魏觀

魏觀字杞山武昌蒲圻人父雲瑞隱德弗耀觀讀書蒲  
首山中勤苦弗輟性喜吟咏觸物感興陶寫自如乃構  
亭曰梅初以寄志焉元呂忠肅公讀其詩嘆賞薦於朝  
辭弗就江漢既平觀被徵與青田劉基金華宋濂諸儒  
同謁上與語大奇之授平江州學正遷國子助教浙江  
提刑僉事吳元年改兩淮都轉運使入為起居注一日

同待制王禕侍上問曰漢高祖唐太宗孰優觀曰太宗  
雖才兼文武於善未免矯揉高祖豁達大度規模弘遠  
以茲觀之高祖為優上曰高祖之度人皆知之然其記  
兄嫂之怨封其子為憂羹侯怨豐之叛不封雍齒不肯  
以豐為湯沐邑度亦未弘矣太宗規模雖不及高祖然  
能其駕馭羣臣各為已用大業已定卒能保全功臣此  
則太宗為優也洪武初建大本堂命觀侍太子說書及  
授秦晉諸王經觀有詩記之

詩曰翠葆藏疑九鳳旗東  
華遙望立多時都堂啓事

貂蟬集宿衛輪班虎豹馳月繞珠簾陞講席花迎二年  
金輅肅朝儀六王炳炳前星後珠緯聯輝上玉墀

十月甲戌天降膏露于乾清宮禁林上問災祥觀曰帝

王恩及于物順于人則甘露降陛下誕寬民賦衆庶懽

豫底于教寧神應之臻職此故也十一月冬煖如春上

召偕危素詹同吳琳宋濂遊觀內苑錫燕紫閣御製序

文賜之曰卿等各賦一詩以述今日之樂觀奏詩

詩云深冬

晴煖動逾旬內苑遊觀詔侍臣五色慶雲開鳳尾九重

麗日繞龍鱗和鸞喜奉彤車御式燕忻叨紫閣賓淑氣  
已從天上轉人上覽之大喜三年正月轉太常卿賜之  
間無地不陽春

制曰太常之職掌郊廟社稷山川羣神之祀厥任重矣爾觀學行方正事朕有年屢持憲節振揚風紀及領鹽運勞績茂彰頃居翰院日記言動朝夕之間屢進讜論尤簡朕心茲用長于太常益恭乃職七月命觀改定太廟祝文稱孝子皇帝臣凡遣太子行禮稱長子某著為令是月陟為侍讀學士十二月辛酉編集大明志成以觀為嘉議大夫國子祭酒宋濂為司業四年廷試進士觀與博士孫吾與修撰王傑為讀卷官乃得吳伯宗等



一百二十人時開科之始得人寔盛而伯宗卒為名臣  
人以此多觀之識九月坐考祀孔子禮不以時奏乃謫  
觀知龍南縣漁知安遠縣行未至任即召還以為禮部  
主事上賜燕奉天門喜曰前日逐卿去今日與卿飲何  
其樂哉仍命各賦一詩五年三月上念姑蘇為京輔重  
地經張士誠之亂荼毒罔有寧宇廷臣咸薦觀有治才  
乃出知蘇州府既蒞事懲陳寧竒政鋤暴樹良寬而且  
肅敬老恤民大建學舍乃闢宣聖廟庭舉鄉飲酒禮聘

郡賢士周南老王行徐用誠與教授貢穎之定儀節高  
啓王彛張羽闡文學郡多耆耄崑山周壽誼年百有十  
歲吳縣楊茂年九十三林文友年九十二皆延至之禮  
成彬彬可觀壽誼還躬餞諸郊再拜送之觀者如堵時  
戎事徑德百物彫耗禮文衰落乃能力挽躬行風教勃  
興封部皞皞課績為天下最上嘉之陟為四川行省叅  
知政事蘇父老上疏願留仍命觀還郡七年觀以舊治  
為士誠竊據且郡多水患乃修府浚河以壯士觀以資

民利御史張度誣其興既滅之基遂與高啓等俱獲罪  
上悔之命所在致祭皇太子諸王哀賻有加乃歸瘞于  
蒲圻燈窩山廖道南曰杞山予里人也予自髫童訪其  
廬吊其墓未嘗不泣然悲焉及誦其所為蒲山牧唱集  
思見其人而弗可得也既而讀揚符鄉序曰先生之心  
廣大而高明先生之才篤實而端重其學博其辭贍其  
所履任率有成績事至不擇利害而為之有古大臣君  
子之風黜國沐璘亦曰貌偉而修氣完而優聳衡廬之

神秀瑩江漢之清秋其為德也雖畊而隱其為名也匪  
釣而求與宋景濂碧崖亭辭蘇伯衡梅初亭記相符合  
也贊曰維我蒲山衡嶽之支維我萇川洞庭之湄先生  
崛起于蒲之里邦之司直國之良史伯衡有記景濂有  
辭璧月珠星光彩陸離

學士拜祭酒李時勉

李時勉名樵以字行江西安福人五歲即知學七歲小  
學四書皆能成誦甫成童言動以禮既長大肆力於學

夜以達旦隆冬盛暑無間永樂甲申進士選庶吉士預修太祖實錄守制服闋起復授刑部主事仍與纂修書成轉侍讀三殿災詔求直言時勉條陳十五事一曰停止工作二曰罷四夷朝貢三曰汰冗官四曰賑饑荒五曰慎選舉六曰嚴考覈七曰理刑獄八曰黜臧官九曰散處達官十曰罷遣僧道十一曰省買辦十二曰革接遞軍夫十三曰免生員充軍十四曰設法儉運十五曰優恤軍士太宗嘉之未幾被讒下獄既而宥之癸卯以

揚榮薦復其官洪熙初上疏言事命武士以金瓜捶之傷肋幾死明日改監察御史又明日下錦衣獄宣宗登極謂左右曰李時勉能直言忠臣也召對于萬歲山命誦前所上疏時勉誦至六事少止曰天威嚴重不能詳記上微笑曰政自難言耳問奏稿在否曰已焚之矣特命宥之修兩朝實錄成進侍讀學士一日上幸史館撒金錢于地衆爭取之時勉端立不動上親取袖中餘錢賜之又幸文淵閣命諸學士飲上曰時勉非朕安能飲

此酒正統戊午陞學士已而遷國子祭酒既涖任崇廉  
恥抑奔競別賢否示勸懲士習丕變諸生有疾躬為醫  
療至於貧不能娶死不能殯者皆為營辦恩義兼盡不  
啻父子疏請修太學王振怒坐以擅伐官樹枷號監前  
監生石大用上章救之獲免嗣是屢乞休諸生伏闕輒  
留之歲丁卯懇疏致仕允之命給驛舟賜寶鑑為道里  
費去之日諸生涕泗送者數千人觀者如堵既歸聞車  
駕蒙塵號慟上疏言選將練兵數事卒諡文毅改諡忠

文廖道南曰予觀名臣錄稱時勉至孝父有疾躬親湯藥不離側恤孤救難無間戚䟽楊文貞公云時勉文學老成操行修潔節義足以表俗剛正足以任事量足以容物而志則不可奪真確論也彭韶贊曰嗚呼剛士浩然正氣博聞有養學自中秘危言峻行厯事四帝臣身百折臣心不替學士司成奸驕我忌荷校願代門徒之義歸老於田名儒風致

侍講學士署祭酒邢寬



邢寬字用大直隸無為州人幼穎敏力學不輟永樂甲辰廷試初擬孫曰恭為第一太宗皇帝以曰恭一暴字耳及見邢寬二字甚喜遂親擢為第一授修撰預修仁宗實錄轉侍講正統戊午預修宣宗實錄賜織金文綺加從五品俸己未同考會試尋引疾家居上言民情十餘事丙寅召至復任丁卯主考順天鄉試景泰壬申進侍講學士署南京國子監事卒廖道南曰予考國史稱寬居家孝友與人交終始不渝且處心夷坦於物無所



士尋改國子祭酒天順戊寅卒廖道南曰予讀國史稱  
詢剛直慷慨但嗜酒豪放不矜細行及攷松志乃知其  
素履考無咎也贊曰脩然有鶴唳于華亭刷羽林臯揚  
聲海濱彼美人兮抱光含醇秉德惟恒履險不傾

侍讀學士拜祭酒陳鑑

陳鑑字緝熙直隸長洲人父潤戍遼道經京師以鑑托  
于舊游范叔瓚遣從王居為神樂觀道士正統戊辰進  
士及第授編修景泰中轉修撰充經筵講官天順初預

修一統志遷侍讀成化初預修英廟實錄進侍讀學士  
未幾補國子祭酒初祭酒邢讓為大學士萬安構害延  
蔓及于鑑會廷鞫讓辨不已鑑曰吾為國師安能喋喋  
對刀筆吏哉遂自誣服除名楊守阯上書訟其寃廷議  
壯之庾道南曰予讀碧川論救鑑疏有云文章政事時  
望所歸自今論之其人品可知雖幼從羽衣長即儒服  
變墨崇正亦可尚也贊曰師道克艱匪人弗受法紀克  
明匪人弗宥緝熙之悞惟立之救人兩恕之孰批厥繆

寺學

直學士兼太常卿范常

范常字子權滁州人宋青山先生孟申孫也幼警悟嗜學淹貫古今性夷粹無競篤於行義鄉里咸重之謂其有青山先生風至正甲午太祖兵克滁駐蹕城中常以文學聞即召見禮遇之預典兵牘授總管府知事從克和州乙未六月扈蹕渡江取太平授元帥府都事丙申三月定建康皆預謀議自是下毗陵及取江南諸郡贊

畫居多辛丑七月乙酉朔命為太平知府既至募民種  
藝時兵亂乏種官廩有穀數千石常請於朝悉發貸之  
至秋大稔私庾既實官廩亦充乃興學校延師儒民甚  
安之上嘉其績召入為侍儀訪以時政及古今事宜常  
直對無隱又嘗紀滁和事績上之上嘉悅洪武元年四  
月癸亥擢為翰林直學士尋兼太常卿時肇興禮樂講  
究設施常多預議無何以疾免尋起為起居注復懇乞  
歸上重念其老許致仕御製詩四章寵之賜宅一區于

太平因家焉子祖仕至右通政改雲南左叅政廖道南曰  
豐沛之歌壯士興懷南陽之謠勳戚增榮而况漆沮造  
周亳都肇商振古如茲矣我聖祖起中都一時風雲景  
從攀鱗附翼者固皆魁梧奇偉倜儻雄杰士也如范常  
者蓋居一於是矣贊曰神龍奮淵蛟螭蜿蜒威鳳翔霄  
鷗鶚踟躕真人纂厯時乘御天聲應氣求無物不然子  
權俊又紹武青山起于帝鄉厯試間關

侍講學士拜太常少卿高巽志

高巽志字士敏徐州蕭縣人元末僑寓嘉興幼嗜學從父宦游吳中時宣城貢師泰鄱陽周伯琦皆與之交後為鄮山書院山長洪武二年徵修元史授編修歷陞侍講學士建文中擢太常少卿時黃子澄為正卿與定國難夙夜匪懈庚辰同董倫主考會試得胡廣吳溥胡濙輩皆為名臣是科同事者則右拾遺朱逢吉編修吳勤葉惠仲趙旭張秉彛及殿試讀卷則劉三吾也三吾以韓克忠覆試被害而葉惠仲則死于建文之難云贊曰



中原之區徐土為關山奔以此水迅而湍爰有高君雲翔羽翰輔儲効命史炳如丹

太常少卿兼侍讀學士林文

林文字恒簡福建莆田人宣德庚戌進士及第授編修正統初預修宣廟實錄轉修撰景泰中遷左諭德兼侍講預修歷代君鑒及方輿志進左庶子英宗復辟改尚寶卿兼侍講未幾擢學士以老乞休上謂李賢曰文老成忠厚宜留之成化初擢太常少卿兼侍讀學士卒贈

禮部左侍郎子載為中書舍人廖道南曰予觀莆陽文獻志稱文年逾七十神觀精爽安靜守禮所著澹菴集自成一家乃知渾朴和厚之氣尚存全璞也贊曰方壺之陽翠峨眇繇扶輿清淑代產仁賢若恒簡者抱朴守恬疊疊令名奕世猶傳

太常少卿兼侍讀學士劉儼

劉儼字宣化江西吉水人正統壬戌進士第一授修撰秩滿轉侍講未幾進右春坊大學士兼侍講預修歷代

君鑒及寰宇通志成遷太常少卿兼侍讀學士景泰七年  
考順天鄉試大學士陳循之子瑛王文之子倫不第共誣  
儼欲置極典賴大學士高穀救之朝廷卒直儼至是卒  
贈禮部侍郎諡文介敕有司為營墓祭倪文僖公哭之  
曰公挾其所得掉鞅文場蚤有聲于鄉解是以一出而  
魁天下多士景瞻衆山之宗岱入官詞林大放厥辭議  
論敷陳則又瓌異而光怪蓋才之蘊於中也閎深而氣  
之昇於天者豪邁故每纂述刪定筆削繁簡適中而是

非不貸嘗典文衡華胄被黜反文章而誣害卒之邪不干正志不少挫廷議允伸而聖明是賴使盡用其才也則可為士之矩矱國之著蔡奈何遽爾溘然不登耆父卹典是加而諡為文介廖道南曰予嘉靖甲午自徽召還是秋典順天文衡時當途如張閣老汪冢宰夏宗伯林司空諸子姪咸就試不第交構考官置之重憲既而仰賴宸斷洞燭羣情乃知劉文介之被誣不減于三吾也贊曰勁松不屈鷲鳥不朋人亦有言蹈道如奔惟彼

文介力抗權倖孤忠直氣挽回文運眇予小子時復仰  
高實獲我心矢忠宣勞

太常卿兼侍讀學士孫賢

孫賢字舜卿河南杞縣人景泰甲戌進士第一授修撰  
預修寰宇通志成轉侍講天順初改左中允侍東宮講  
讀憲宗即位遷太常少卿兼侍讀成化庚寅預修英宗  
實錄進太常卿兼侍讀學士上疏請立皇太子且引疾  
乞休示無希覬意章並上上皆允之皇子立是為悼恭

太子賢憤憤不樂而卒年五十四贈禮部侍郎兼翰林院學士廖道南曰夫宋儒有言君子為名譽而為善則其善必不誠人臣為利祿而効忠則其忠必不盡乃若孫君建請立儲其意善矣而又怏怏含憤無乃有為乎贊曰商山茹芝羽翼何人晉國乞塊衰經寶親建儲公議辭爵虛名二者交戰罔恤厥身

太常卿兼侍講學士吳節

吳節字與儉江西安福人為諸生時偕劉球李紹王原

受學于麻城鮑楚山宣德己酉鄉試第一明年登進士  
選庶吉士授編修秩滿轉侍講擢南京國子祭酒先是  
慈谿陳敬宗以嚴立教節濟之以寬諸士感化成化紀  
元召修英廟實錄充副總裁官改太常卿兼侍講學士  
書成進太常卿兼學士節為人簡易質直信人不疑為  
文如其為人奉母至孝子遠舉進士為知府丘文莊公  
銘其墓曰三代盛時人行直道任其天真庸常是蹈世  
降氣漓存者幾希懿哉先生今之古人我存古心謂人

皆然官非不崇學非不深求先生者當於其心廖道南  
曰予觀吉安志稱節學博才雋己巳之變條陳時政多  
切利病及考文莊之銘亦然贊曰師道貴嚴臣道貴忠  
顯允吳君克嚴克忠時政之規國學之範金石有銘永  
世可鑒

太常卿兼侍讀學士王獻

王獻字惟臣浙江仁和人甫弱冠登景泰辛未進士改  
庶吉士授編修預修寰宇通志陞修撰秩滿遷左諭德



兼修撰庚寅充日講官壬辰進學士明年賜金帶丁酉  
追崇宣聖禮樂遣獻祭告闕里預修宋元綱目成陞少  
詹事兼學士戊戌皇太子出閣日侍講讀預修文華大  
訓擢太常寺卿兼侍讀學士獻美風儀性穎敏書一過  
目即強記才思飄逸與大學士商輅有隙或造為曖昧  
不根之語以揚於內坐是不得致大位掌院事者十六  
年奄奄不得志而卒贈禮部右侍郎廖道南曰詩有之  
取彼讒人投畀豺虎何惡之深拒之嚴也堯舜聖讒說

孔子惡佞人古之至聖必謹于茲乃若禿婦傳之譏不知獻有無而竟以此終其身可畏也哉贊曰青蠅貝錦詩詞所悲鄭聲紫色孔訓所垂英英王君兩淞之杰誰為此讒終不可雪

侍講學士晉太常卿張芮

張芮字文卿山西安邑人成化戊戌進士選庶吉士授檢討弘治初預修憲廟實錄暨會典正德初復修孝廟實錄轉修撰進侍講學士以憂歸所居近河東運司鹽

商有訐奏者詞連及為時劉瑾方欲以事裁抑儒臣遂坐累出為鎮江府同知再謫兩浙鹽運司副使量遷處州府同知瑾誅始入為南京尚寶卿進太常卿致仕為為人朴實其處僚友無收害心然性嗜酒終日酣醺於種學績文非其好云廖道南曰予嘗聞弘治間有造為俚語者曰一枚黃老五箇白丁時張為武衛諸人頗倦于學故來人之譏如此及予計偕乃識為之子漁甫要亦朴野士也贊曰周官鹽人足供王貢漢室鹽官亦濟

國用云何張君密邇解池人之謗也卒以茲違

太常少卿兼侍講學士楊時暢

楊時暢字知休陝西咸寧人戶部尚書鼎之子也成化  
戊戌進士選庶吉士授檢討弘治紀元預修憲宗實錄  
轉脩撰充經筵講官改右贊善秩滿遷左諭德預修會  
典進侍講學士續修玉牒擢太常少卿兼職如故卒李  
文正公銘其墓有曰經業有門周豕義文史法有傳鉞  
貶華褒講幄敷陳藝苑甄擇有一于斯皆公遺則有笏

堆床有里鳴珂仲叔之間孰與伯多嗚呼西涯可謂善  
名狀矣贊曰韓公諸子忠彥有聲范老諸子純仁惟貞  
世席箕裘時傳琬琰知休何人傳世丕顯

藝學

侍講學士沈度

沈度字民則松江華亭人洪武中舉文學弗就謫雲南  
岷府聘之弗就都督瞿能延之家塾携至京師太宗命  
選善書者供事史館大學士楊溥薦之擢翰林典籍時

解縉善真行書胡廣善行草書滕用亨善八分書王汝  
玉梁潛善真書度于其間獨稱上意補檢討轉修撰進  
侍講學士卒廖道南曰士之逢機構會鴻漸高雲蛟騰  
遠海者曷可勝數若沈君者周旋滇嶠迴翔燕甸卒能  
奮翼赤霄策名紫清其大篇長書遒勁清潤至今為詞  
林稱賞是亦高士也贊曰鍾繇古隸逸少草書虎鳳飛  
躍蛟螭縈紆沈君妙絕時稱獨步縈名彌播玉堂之署

侍講學士武周文

武周文北平大興人初以儒士明經入侍燕邸太宗龍  
潛時命入侍講永樂丙戌召至慰勞備至特命為侍講  
學士賜冠帶金織羅衣一襲上謂學士胡廣曰朕守藩  
時閒暇喜觀易時王府官寮間亦有知者然未若武周  
文切實但所言亦有拘滯不流動處蓋易貴知變不失  
其宜古人隨時從道之說寔為要妙亦在虛心玩之耳  
又曰為學不可不知易只內君子外小人一語人君用  
之功效不少次日周文入謝上憫其老乃命為侍講學

士賜之休沐廖道南曰夫易之道廣矣大矣以言者尚辭以動者尚變以制器者尚象以卜筮者尚占是故程傳尚辭朱義尚占至於尚變尚象非聖人孰能知之文皇聖諭所謂易貴知變不失其宜者千古讀易之心法也不識周文曾有一于是乎贊曰易之道大匪聖弗知象之數幽匪神胡為確哉武君一言悟主老而益壯永終厥譽

太常少卿兼侍讀學士金問



金問字公素蘇州吳縣人永樂初以善書薦授司經正  
字侍皇太子于南京因進賀表文稽滯太宗怒曰朕不  
識金問何人乃得侍太子并黃淮楊溥王凱下獄十年  
仁宗登極釋之轉修撰每論時政多見采納宣德乙卯  
遷太常少卿兼侍讀學士正統癸亥調南京禮部侍郎  
卒廖道南曰予觀姑蘇志謂問有逸才長於辭翰及攷  
國史乃知其論時政多所裨益胡可以他流少之哉贊  
曰匪位之患惟名之昭匪名之患惟德之昭嗚呼公素

藻翰飄飄致身廊署揚聲清朝斥鷃鵬鵬貽誚扶搖

侍講學士拜祭酒劉鉉

劉鉉字宗器直隸長洲人幼習楷書選翰林秀才中順天鄉試授中書舍人宣德初預修兩朝實錄遷兵部主事正統初預修宣廟實錄擢侍講曹鼎薦教庶吉士已已進侍講學士景泰初充經筵官遣祀濟瀆壬申大學士高穀薦改國子祭酒嚴條規淑諸生天順改元擢少詹事侍東宮講讀卒贈禮部左侍郎諡文恭子闕為大

理丞廖道南曰予觀姑蘇志稱鉉介特自持言行不苟  
揚文貞揚文定嘗過其所居名假菴甚湫隘稱為古人  
云贊曰朴不離俗介不附權嗜學不倦立志彌堅所居  
假菴廳不旋馬文貞文定稱賢不暇

贈學

贈學士諡文節王禕

王禕字子充浙江義烏人幼師同郡黃潛與宋濂胡翰  
為友博通羣書究極奧窔慕司馬遷之文探禹門泛錢

塘涉江濤沂震澤久而有得乃趨淮徐訪鄒魯北游燕  
趙嘗有薦為經筵國史者落落難合高皇帝取婺州禕  
來謁乃撰平江西頌上覽而喜曰吾固知浙東有二儒  
者卿與宋濂爾學問之博卿不如濂才思之雄濂不如  
卿遂以為江南提舉司校理改侍禮郎兼引進使未幾  
同知南昌府事竣召還議郎位禮奏對忤旨復出判漳  
州府元年五月禕上疏畧曰古帝王定天下成大業祈  
天永命為萬世無疆計者亦惟在乎修德而已矣君德

既修天眷彌固書皇天無私惟德是輔此之謂也修德之要有二曰忠厚以存心曰寬大以為政故成周以忠厚開國故能垂八百年之基漢以寬大為政故能成四百載之業陛下資不世出志大有為艱難十載大業已成周文武漢高光蓋無讓焉今日所當急務者惟於忠厚寬大加之意而已二年六月召修元史以禕與宋濂為總裁官同知制誥兼國史編修三年以失朝故與濂俱降編修使招土番未至復召還五年正月遣禕偕

蘇成奉詔雲南禱諭梁王巴圖曰聖上聰明神聖新創  
大業是天命人心之所歸惟爾有衆僻在西南未洽聲  
教故遣使者來諭意今能亟奉版圖歸職方則尺地一  
民按堵如故高官厚祿不爾吝也否則魚遊釜底終取  
夷滅時有元遺孽自立于沙漠者遣使托克托徵糧雲南  
且欲連師以拒我知禕說梁王欲屈以威禕罵曰天訖  
汝元命我明代之汝知燭火未盡敢與日月爭光乎顧  
謂梁王曰汝朝殺我大兵夕至矣遂被害時六年十二

月二十四也卒年五十二子紳以十五年往求遺骸布政張統叅政王景紀其事建文中贈學士諡文節正統五年郡丞劉傑白其忠復贈學士諡忠文所著有華州集玉堂雜著續東萊大事記廖道南曰予讀鄭濟所述子充行狀方孝孺所撰奠章諡議與夫像贊泣然興悲及考文集乃見宋景濂稱其文曰喬嶽長河摩日月盪雲烟故其為文也波浪湧而魚龍張風霆流而雨雹集胡仲子亦曰雍容俯仰如冠冕佩玉馳騁分布如風雲

蛇鳥可謂之知言也已林塾贊曰惟公長身屹如山立  
人一望之儼不可即惟德執恒惟威弗畏翔漠孤臣英  
英義氣吁嗟公前有顏魯公公死使命與顏攸同

太常寺卿兼翰林學士黃子澄

黃子澄名湜以字行江西分宜人也少從邑人歐陽貞  
受易周與學受尚書清江梁寅受春秋博學負俊聲游  
鄉校同舍避席嘗賦寒江把釣圖及枯梅詩人爭傳誦  
之洪武癸亥膺貢入太學明年定科舉之制中京闈鄉



試第二乙丑會試第一廷對及第三人俱授翰林修撰  
尋兼春坊官侍東宮講讀累遷太常卿皇太孫立諸王  
以叔父之尊多不遜服一日太孫坐東角門召子澄謂  
曰諸王尊屬各擁重兵何以制之子澄以漢平七國事  
為對太孫喜曰得先生謀吾無慮矣及即位兼翰林學  
士與齊泰皆用事時周齊湘代岷五府相繼煽動上一  
日朝罷召子澄問曰先生憶昔者東角門之言乎子澄  
曰不敢忘也然須密退與齊泰謀之泰欲先燕子澄曰

周燕之母弟取周即翦燕之手足而燕因可圖也入白  
之上遂遣曹國公李景隆圍河南迫周王橐至京遷之  
雲南徙代王桂于邊湘王聞討狼狽闔宮焚死執齊王  
榑囚之京師岷王梗降為庶人雖聖德如燕藩亦捃撫  
其事加誚讓朝廷以子澄為功褒賞之燕於是上書救  
周罪子澄指為連坐決意討之己卯三月命都督宋忠  
等北征七月靖難師起移檄大意言上崇信姦回離間  
骨肉遵太祖皇帝命奉天征討罪人既得則法周公以

輔成王首以誅齊泰及子澄為名遂破雄縣懷來遣長興侯耿炳文禦之互有勝負子澄慮師老遂請上班師詔以李景隆為征敵大將軍率諸將兵凡百萬以往景隆自負有文武才子澄亦薦之上寵信特深甫行餞之江許賜犀玉帶諸將各一賞賚無筭子澄授以拍畫景隆依違而已子澄甚憂之未幾景隆攻北平城累戰皆大敗奔還京師赦不治子澄哭諫曰景隆出師無紀度意在觀望不誅之以謝宗社何以懲將士不聽已而徐

凱盛庸繼踵敗歟顧民等皆降子澄拊膺大慟曰大事  
去矣萬死不足贖誤國之罪乃賦一詩以志痛詩曰仗  
鉞曾登大將壇貂裘遠賜朔方寒出師無律真見戲負  
國全身獨汝安論將每時悲趙括攘夷何日見齊桓尚  
方有劍憑誰借哭向蒼天幾墮冠聞者哀之尋用侍臣  
議詔謫子澄及齊泰于遠方以快敵意其實使之募兵  
也時諸將猶守淮南而文廟忽渡江矣潭王與李景隆  
開門迎附子澄出走蘇州語見姚善傳詔執之捕獲責

問不服死之命赤其族同時被戮者俱號齊黃姦黨榜示天下一子逃難易姓為田經宥乃復姓家湖廣之咸寧孫表登進士廖道南曰古語有之犬各吠為其主言忠貞之不可貳也荀息死晉召忽死齊固其分焉爾子澄與齊泰方孝孺謀國之臣安得不死難以自負于天哉贊曰舍生取義殺身成仁矧為人臣敢自謀身晁錯雖忠袁盎弗平天寔為之人何為能

直文淵閣侍讀學士改文學博士方孝孺

方孝孺字希直一字希古浙江寧海人世家侯城里族甚蕃父克勤元季隱居萬山中其學得諸晦庵而源流伊洛尤邃於易名振東南洪武初為濟寧知府有異政子三人孝孺其仲也至正丁酉始生之夕有木星墮於其所故其性資精敏絕倫長老見之皆咄咄嗟異方髫鬣已善屬文雙眸炯炯如電讀書十行俱下日積寸許見典冊所載聖賢名字或良將相形貌輒默記欣然有願慕之志鄉人呼為小韓子年十五侍父官遊濟上覽

周公孔子故宅求七十子之遺跡慨然嘆曰使吾得遇孔子同時縱顏閔未可幾及其餘若樊遲冉求輩豈可多讓哉但恨今世無聖人不得所依歸耳曹國公李文忠一見奇之待以國士年二十翰林學士宋濂方在朝以文章道德推重海內四方至其門者輻輳洪武八年克勤嘗絳誤繫京獄孝孺實從數言於朝請代父死既而謫戍江浦又上疏乞身代役皆不報克勤自獄中遣孝孺從漁游孝孺持所為文上謁濂願受業濂一見

大加賞異謂孝孺曰吾備位禁林數年來閱天下之士亦多矣而未有如子者子之文非當世之文也願肯從我游乎即日館置左右日與討論經史為文辭濂歸金華孝孺往來山中凡四年盡得其所學自是文章繼濂而起一時四方耆儒宿俊無不折輩行與之交而胡翰蘇伯衡葉見泰輩在衛東尤以文學知名當世每見孝孺未嘗不心服也會父坐空印事草疏將詣闕伸理而父沒扶喪歸葬濂尋徙蜀孝孺欲往省不可以文籲天



願輸壽以延之。漁嘗欲甥之而不果。洪武壬戌上用學士吳沉揭樞薦詔徵至京。入見陳說多稱旨。上問樞曰：「孝孺孰與汝？」對曰：「十倍於臣。」錫之宴几。稍歌必正而後坐上。使人覘之。喜其舉動端整。謂皇太子曰：「此莊士也。」當老其才以輔汝。試靈芝甘露論上。每面試舉子輒親定高下。註選至孝孺獨不註。曰：「異人也。」吾不能用。留為子孫光輔。太平足矣。皇太子素重其才。召賜食東宮。待以賓友。孝孺既歸益杜門纂述。不出會仇家得罪詞。

連孝孺有司例簿錄家貲械赴闕下太祖立命釋之孝  
孺奉祖母挈妻子家屬數口還鄉鄉人感歎以為盛已  
而家益貧窘無為資孝孺處之泰然不以為意嘗卧病  
絕糧家人告乏則曰聞古人有三旬九食者窮豈獨我  
哉吾嘗勝之矣授徒石鏡精舍若將終身二十五年復  
辟至上方重賞罰以其志存教化謂左右曰今非用孝  
孺時乃除漢中教授詔許水陸給舟車明年閏四月携  
妻子抵任山郡荒僻水土暴惡病瘳瘳者十之五士人

鮮少雖五經亦無全者孝孺安之嗜蔬糲若飫萬鍾者  
每昧爽升席為諸生講解文義至暮曉曉無惰容由是  
山南人皆知向學二十七年春蜀獻王聞其賢以賓禮  
召見每有所陳論輒虛懷聽納恒曰方先生古之賢者  
也皇太孫聞其名癸酉丙子徵入典試應天府二十一  
年閏五月太祖大漸遺令必先召孝孺建文帝立馳驛  
召還將用為執政天下莫不以王佐責望旦夕成功而  
用事者忌之乃止遷翰林博士再遷侍講直文淵閣日

侍左右備顧問德望素隆一時倚重尋定官制改侍讀  
學士為文學博士以孝孺為之是時館中徵集四方名  
士修太祖實錄及類要後而永樂大典諸書皆命總裁  
監修諸儒于所長各互有得失至孝孺則卓然為一世  
儒宗朝廷大制作皆出其手靖難兵至京駐金川門外  
宮中悉自焚三十五年六月十四日孝孺聞之持斬衰  
服晝夜號哭太宗即位欲詔天下問左右誰可草詔者  
廷臣以孝孺對上遣人召之數次皆不至上乃使擁之

入見孝孺既至見上益悲慟聲徹殿陛間左右禁之莫能止上親降榻慰諭之曰我家事耳先生何良苦又曰先生為我作詔命左右給以紙筆孝孺大抵數字訖擲筆於地曰死即死耳詔不可草上大怒磔之夷其族孝孺臨終作絕命辭一章詞畧曰天降亂離兮孰知其由奸臣得計兮謀國用猶忠臣發憤兮血淚交流以此徇君兮抑又何求嗚呼哀哉兮庶不我尤識與不識哀之如親戚年四十六復有旨收其妻鄭氏使者至其門已

經死門人王稔輩收孝孺遺骸殯之聚寶山宗族坐死者八百四十七人廖道南曰予聞諸黃泰泉云孝孺得家庭之教於書靡不通究常慨然以古聖賢自期以經綸天下為己任弱冠作深慮等論十九篇謂化民必自正家始又作宗儀十八篇雜誠三十八章識者已知其運用指設不凡矣在宋濂門為高弟子從濂後每私居念及或見其手跡或對客談及濂事輒涕泣既官漢中其家不能存言於蜀王嘗撫卹之墓在夔每舟次夔必

往祭墓下慟哭移時乃去在建文時羽儀斯文隱然為  
當世重以蜀王嘗賜號正學齋世號正學先生所著有  
遜志齋集三十八卷大易枝辭周禮考次武王戒書注  
帝王基命錄文統宋史要言諸書皆未傳孝孺文章似  
宋蘇軾雄邁奔放泝龍門狂流倒峽而氣不可遏發為  
論著醲粹都郁雖博極羣書而根據六經憲章孔孟宋  
程朱以前無有也漁嘗推之謂歐陽少師蘇長公姑置  
勿論自餘諸子與之角逐文藝之場未知孰為後先其

後李賢亦稱孝孺師景瀛議論波瀾類東坡之才而忠義之氣凜然不可犯景瀛不能及世以為知言嗚呼忠義在宇宙文章在金石孝孺雖死猶生矣謝鐸贊曰我台之學考亭是師迨於愚庵實聞而知愚庵之子是曰正學益擴而充上泝伊洛如麟在數如星在晨旁觀一世絕類離倫潛溪之門盡天下士驚叱起立謂莫敢比心實希聖自視畎然銘盤書紳雜誠惓惓家人有箴宗儀有紀謂道之行莫先於此學以氣充磅礴四行孰顧



孰思禍福死生歷宋迄元士氣益下有復古初不在作者

贈學士諡文僖張益

張益字士謙蘇州吳縣人隸籍江寧永樂乙未進士選庶吉士授中書舍人轉大理評事正統戊午改修撰於內府授內使書已己進侍讀學士知制誥初與夏景同年景好寫竹偶見益所撰石渠賦遂絕筆不作文益見景寫竹妙絕亦不復寫竹是歲七月額森入寇上命益

同侍郎曹鼎扈從皆死于土木之難贈學士諡文僖官  
其子翊為大理寺評事倪文毅公銘其墓曰先生之文  
海澄山崇先生之德天和日融先生之節抱義死忠鳳  
臺之原龍江之東歸兮故鄉乘雲御風廖道南曰予讀  
姑蘇志稱益為人清淳端謹文章圓熟對客數千言揮  
毫立就及觀國史乃知死于土木之難嗚呼悲哉贊曰  
不有居者誰守社稷不有行者誰扞牧圉六飛蒙塵羣  
克僇僇臣則何知有死而已

贈學士諡忠愍劉球

劉球字永樂江西安福人永樂辛丑進士授禮部儀制  
主事時尚書胡濙草創禮儀悉球裁定遣使蜀府行喪  
禮餽遺一無所受正統初開經筵濙首薦之擢侍講預  
修宣廟實錄成加五品俸己未京師大水球具陳治水  
事宜識者韙之辛酉麓川叛遣定西伯蔣貴征之球上  
言帝王馭夷狄必宥於其小而防於其大是故周伐崇  
不克則退而修德至獫狁孔熾則命南仲城朔方漢征

南粵不利即罷兵以通好至匈奴陸梁則命魏尚守雲  
中夫以周漢之盛視崇粵如振槁耳乃釋不誅而惟急  
于北方盖不窮兵于小敵以傷生靈惟防患于大寇以  
安中國故也今額森併吞諸部深謀入侵而思任發依  
阻山谷悔過乞降議者乃釋豺狼攻犬豕舍門庭之近  
圖邊徼之遠非計之得也臣愚以為麓川僻陋滅之不  
為武釋之不為怯特降璽書原其罪過固結木邦以為  
我援分屯金齒以離彼黨是即周漢修教賜告之意至

於西北諸邊敵勢尚強戎馬尚衆宜謹烽堠修塹堡選將帥練士卒豐糧餉備器械勅總副諸將以巡視塞垣戒參贊文臣以區畫軍務是即周漢備禦城守之意疏上上命都御史陳智傳諭戒飭沿邊諸郡時太監王振擅權喜功開釁復大舉伐麓川癸亥夏雷震奉天門鴟吻詔求言球覆上言十事其一謂權柄不可下移振見之怒適編修董琳自陳願為太常卿疑球助之乃下詔獄錦衣指揮馬順拷訊備極慘刑球既死于非命舉朝

慟之景帝監國都給事中王鉉率百僚廷擊馬順暴其尸初編修鍾復與球議連名上疏其妻沮之後聞球死復怏怏卒其妻以告其子同故同卒為直臣死于諍云景泰初贈學士諡忠愍廖道南曰仲尼有言志士仁人無求生以害仁有殺身以成仁夫球之志於仁也務引君以當道慷慨激烈首論額森之必寇繼發王振之奸邪身就斧鑕殺身成仁卒之乘輿播遷中原板蕩雖野厭王振之肉廷暴馬順之尸竟亦何益嗚呼有天下者

可以鑒矣彭韶贊曰於惟忠臣詞林之英沉思力學好義勇行大阿倒持執命腐刑之戒履霜勿致堅冰不售蒙難乃險而傾褒贈官階節惠易名凜凜大節萬世猶生

殿閣詞林記卷六